

四庫全書

史部

欽定四庫全書

史部

廣東通志卷四十七

詳校官監察御史_臣龔驥文

檢討_臣德生覆勘

總校官檢討_臣何思鈞

校對官中書_臣王鍾泰

謄錄監生_臣趙希濬

欽定四庫全書

廣東通志卷四十七

人物志忠烈

四自明忠烈傳起至隱逸傳訖

明唐奎字景文南海人洪武初以經明行修薦授增城教諭博洽羣書鄉人號曰唐書匭湛菜民作亂往諭之被執不屈罵賊而死子豫在孝義傳

陳敬增城人洪武十四年以賢良舉授禮部主客司郎中遇事敢為以事左遷雲南曲靖府幕官尋署劍

川州事劍川鄰寇竊發來攻州城敬親率壯士禦之
衆寡不敵其下欲退敬瞋目大呼奮勇前進力戰而
死事聞命有司恤其喪

龍敏號松巖順德人正統末黃蕭養入境脅敏歸附
敏抗義不屈偕二子淵源闔門八口同死止存幼子
澈外戚何氏撫而有之澈子宣和弘治壬子舉人晉
江令孫堯達嘉靖己酉舉人永定令

梁奎字文燦順德人以弘治己酉鄉薦判袁州府桃

源賊薄城奎出戰墮馬被執死之詔進秩錄其二子
祀於崇義祠

區瑞順德人初為諸生負節使氣學師銜之言於督
學黜為吏後為德興典史捕桃源賊有功已奉檄城
萬年賊突至被獲欲降之瑞指其腹曰此中皆節義
文章豈可屈耶遂被害事聞亦錄其子與奎竝祀

黎民衷字惟和貫次子器宇端凝言笑不苟弱齡即
工古文詞嘉靖丙辰成進士授行人擢稽勲司主事

晉員外陞驗封郎中謝絕請託奸胥斂手曾有屬貴人欲得王府科者是科司宗室襲代多賕賂民衆執弗與以是見忌出為廣西叅政禁餽獻剔蠹弊度支以饒甲子季冬自橫州行部歸迎春之夕蠻寇銀豹等踰城劫藩庫衆莫敢格民衆聞冠帶而出左右勸止不顧奮身直前率守者與戰力寡不支遂被數創輿歸同列來省民衆問曰公等皆安在府藏無恙否言訖遂絕年四十七撫按以事聞詔賜葬遣官護其

喪歸士民請祀名宦所著有司封集

林咸字季虛番禺人嘉靖癸卯舉于鄉知惠安縣歲
戊午倭攻惠安居民僅九百家倭四倍之咸悉力拒
守有越城者手斬之懸首旌竿擒馘七十餘人賊以
呂公車攻城咸製敵棚三座外施絮被內藏銃弩火
鎗射之賊解圍去尋流刦鴨山咸整兵往禦躬冒矢
石為士卒倡騎陷于淖死之巡按御史樊獻科為文
致祭狀聞贈府通判廕子

李堯卿字唐馮番禺人嘉靖癸卯舉於鄉丙辰授寧德令惠政大行民甚德之倭頻年入寇寧德當其衝堯卿先戒嚴修城濬隍練兵飾器已而倭寇數千來攻知有備遂解去父老上其績督府檄獎之歲辛酉倭寇復至繞城而攻堯卿仗劍督戰踰旬城中力竭外援不至攻轉急堯卿度勢亟不可支遂解印遣人馳省下為死守計亡何城陷死之狀聞贈太僕寺丞廕子翁齡為太學生

黃尚正東莞人任江西龍泉縣秀洲巡檢嘉靖辛酉
流賊數千掠縣尚正率兵迎戰殺數十人賊退走雩
田尚正追至復戰後兵不繼與僕有進俱為賊所執
尚正給賊釋僕取贖潛約縣令剋期外攻尚正為內
應且囑僕曰若吾不幸而死乃職分無憾尸不可誤
收遍體有正字者是至夜尚正棄賊醉刃其渠帥數
人縣兵不至遂被害餘賊無主皆四散奔潰泉境以
寧事聞特贈太僕寺丞廕其子承忠入監泉民相率

建祠祀焉

葉霑雨龍門食餼生員重信義有武畧時山寇剽掠
霑雨散財募勇士以相保聚人皆樂附嘉靖間分巡
使者檄捕反寇文朝至而夕獻俘後奉府檄滅黃孫
尚寇赴博羅縣召斬賊首亞公總平之辛酉江源賊
圍城急知縣劉潛以蠟書召霑雨賊聞之解圍去霑
雨追至鐵岡斬賊數百破其二砦奪回俘掠隨同副
將崔子奇奮勇搥巢遇伏皆死之訃聞野哭巷弔上

官令立祠於演武亭左歲祭之子奇配焉其後兄霨
霖剿大寇鄧廷鳳黎永元亦死于戰又有黃茂光者
鐵岡人隆慶辛未水源賊流劫茂光率鄉勇三戰三
捷殲賊首劉四德後為賊所襲没于陣縣旌其廬

唐夢鯤字化卿番禺人家貧力學萬厯乙卯舉於鄉
四上春官不第就閩福寧州學正福寧距省五百里
路多險惡夢鯤力請學使者巡臨考較士德之擢知
仙居縣丁內艱補知天台改知富川復改分水厯宰

四邑皆有政聲時四川礦徒與湖南江華盜公行剽掠兩省會剿無功諸徭怙亂逆拒官軍夢鯤獨單騎入峒徭人聽命權要忌之謫池州府經歷甫至值楚豫叛兵自武昌順流而東所過焚掠當軸知夢鯤才委署池陽事夢鯤棄城力守男婦避難者爭趨入城守者拒弗納民皆望城哭夢鯤選其老稚者入城廩之閱月事平擢知寶雞縣時流寇已至潼關或謂夢鯤曰公年垂耳順可無往矣夢鯤顧星夜交馳甫入

境而潼關失守賊欲取道寶雞夢鯤力禦之未幾李
自成據西安三秦相繼陷沒夢鯤知寶雞終不能獨
完遂縊於官署時崇禎癸未十二月十八日也事聞
贈光祿寺少卿賜祭葬

黎弘業字孟擴順德人天啓辛酉舉於鄉選知和州
州為淮南沃壤而弘業身處脂膏邕苴不入惟以養
民積粟剔奸補弊為事崇禎八年張獻忠自廬陽三
犯州鄙弘業督率士民堅守閱數月賊不入境人有

懈志弘業並申傲臘月賊復來衆數十萬繞城數匝乘大雪斬關而入弘業巷戰敗績引佩刀自刺不殊復裹創上馬摧鋒而死一門俱盡事聞詔賜葬祭贈太僕寺卿廕一子入監順治八年和州學正劉蘇列狀上請奉祀名宦

劉士斗字瞻甫南海人天啓丁卯舉於鄉崇禎辛未成進士初任知太倉州多惠政以公正忤時降江西按察司知事不以閒散自外兢兢執法檄署撫州推

官丁繼母艱歸服闋補成都推官至則撫善良繩奸
宄旋署府篆綢繆撫輯憂勤備至已擢戶部主政尋
晉江西及湖南道叅議百姓痛哭遮留士斗亦不忍
遽去甲申八月闖賊破成都士斗罵賊遇害闔門二
十餘人悉殉義死

鄺曰廣字居節番禺人崇禎丁丑進士授襄陽府推
官耿介自持善理冤獄上官交薦之會沅氛肆虐曰
廣矢忠報國檄往荊州督餉拮据萬狀十四年二月

曰廣還署忽賊衆攻城吏人請避其鋒廣叱之曰我若退步百姓何恃身先登陴受矢刃而死家人在官署曰廣不肯傳語恐搖人心城陷俱被害越七日其僕鄺茂興於南門城上得廣屍士民舁棺殮之報鄖陽巡撫袁繼咸親行祭奠

馬觀鵬字扶泰順德人少英勇奮身從戎崇禎間隨征流賊有功授江西叅將守贛州加副將進階飛虎將軍時年二十四方乞假歸娶猝遇報急衆將請堅

守以待鵬曰不可以私情誤公事遂進兵力戰而死
妻譚氏聞訃矢節在列女傳

霍子衡字覺商南海人瑞州郡丞騰蛟之子弱冠舉
萬厯丙午鄉書初授海康教諭擢國子監助教改都
察院司務遷戶部主事晉郎中管京糧廳出知袁州
府廉潔自持擢太僕寺少卿甲申流賊陷京師遂歸
後竟死節其妾與諸子婦咸從之丙戌冬十二月總
督佟養甲入廣州親往祭奠表其門曰闔門死節之

家同時死者衡姊子番禺舉人梁朝鍾及舉人樊于震諸生郭景相樊良佐黎士奇李應春樊廷槐孫王理玉球南海舉人梁萬爵龍門舉人廖翰標等

右廣州府

鄧顥字伯昂樂昌人少精星術登正統壬戌進士奉使楚藩勞衛士卻贖不受楚藩嘉之且上其事明年授江西永豐知縣平易近民剔除積弊復奏減額外賦歡聲載道玉山有被殺者寃久不雪檄顥治之顥

衣冠隱几卧神啓其衷遂正厥辜境內有樹妖為崇
部民又爭祀妖神以為能免癘疫而終歲大旱顓極
誠籲天俄而大雨如注雷震樹及神像上官高其能
疑獄輒委之嘗蒞事浦城釋當籍沒者三十家覈銀
治免課數千兩布政使吳潤三疏薦之未報適葉宗
留反於浙鄧茂七反於閩永豐當兩寇衝顓嚴為之
備寇至輒俘之後寇勢轉盛都督劉聚都御史張楷
擁兵鉛山逗遛不前寇從浦城直壓永豐顓率兵千

餘迎戰俘賊將二人乘勝而前遇伏被執見宗留罵
曰我為國殺賊恨不磔汝肉裂汝肝遺憾也遂被害
俄而雷雨大作宗留驚懼昇屍高澧巡司署中巡按
御史韓雍以狀聞詔贈光祿少卿遣郡倅李實祭于
其家給帛六十匹粟三十石助葬事天順元年給事
中白瑩為請謚忠毅配祀張九齡祠仍檄廣信府與
張叔夜等並祀子瑗字良璧景泰丙子舉於鄉授大
理評事擢湖廣按察僉事分巡湖北境接貴州徵發

煩劇民不堪命瑗不得行其志致仕歸弟球亦領鄉書有學行師事陳獻章布政使吳廷舉甚重之

吳洪進翁源人天順初廣西徭獠四出侵掠再迫翁源悉力拒之成化元年寇復至洪進為捕盜老人帥衆戰於城南伏兵猿藤逕生擒渠魁一人殺賊三百餘人以為寇不足平進戰于獅子嶺陷陣死之知縣陶鼎為之立祠

何士仁翁源人正德十一年三泷劇賊池仲容自稱

金龍王流刼翁源南贛督府王守仁合江廣之師剿之士仁以陰陽官從征有功入九連山搗巢歿于陣邑令傅雲祀之于忠義祠

李貢字祖禹英德人正德間為荔波令時田州土官岑猛叛從督府姚鏌征之中流矢而死

徐本和英德人嘉靖二十五年賊掠大灣鄉本和為民兵總目率衆截捕先登斬級後援不至遂遇害縣令陳維賢厚葬祭之

劉廷龍英德人年踰六十勇力未衰嘉靖中大羅山
徭賊寇境與同邑周應乾並舉義勇統兵禦戰廷龍
執戈躍馬與賊格鬪斬獲甚衆馬蹶被殺應乾亦力
戰歿於陣知縣譔廷詔為立義勇祠

范漢字印泉英德人與弟潮以武畧聞萬厯四十四
年十八山沅賊行刦通鄉漢兄弟率兵追賊至野豬
灣殺百餘人救出被掠男婦數百援兵不至與弟潮
皆陣亡鄉人祀之保安廟側南韶兵備劉穩旌之曰

勇冠三軍

鄧葵樂昌人忠義鄧顒後裔邑諸生性負剛俠崇禎
辛未流賊破城葵奮身維護縣令林開馥罵賊而死
李能一英德人讀書為儒崇禎四年流賊刦塘下村
族衆被掠能一獨與賊鬪斬九賊賊以鎗刺之奪其
鎗復斃二賊鎗折被擒賊逼之跪能一厲聲罵賊不
屈竟死之

陳志召英德人充鄉總與其二弟皆以勇藝稱崇禎

四年流寇刼掠大陂等處地方志召統鄉兵百餘血戰衆寡不敵被害

右韶州府

馮學明保昌人宣德中以貢入太學授工部主事歷禮部精膳郎中為人敦厚周慎嘗出使寧藩謝卻饋饌王重之正統十四年土木之難鄉人鄧力士在陣中謀與同歸學明曰君辱臣死將安之乎遂陷於陣後錄功廕子瑤為國子生

陳王政保昌人監生任貴州都使司都事厯俸四載
屢登薦剡天啓二年宣慰使安邦彥稱兵逼城困守
經年搜獲間諜匿米數十石盡以餉軍且罄貲橐散
賑部下降冬枵腹垂城斃於城上都御史李樞奏聞
特贈通判

右南雄府

王度字子中歸善人少肄力經史洪武中以明經薦
拜山東道監察御史抗章十餘上多見用建文庚辰

靖難兵起李景隆敗績詔以盛庸代之度密陳便宜
有東昌之捷景隆徵還復秉國政忌庸功讒之度亦
日疎辛巳夏六月濟寧告急度請募兵壬午春小河
之捷命度勞師徐州及永樂即位坐黨禍戍賀縣旋
闔門被繫寘於法戚屬連坐一百五十五戶仁宗即
位詔曰方孝孺等皆忠臣可憫因大赦諸家族之存
者戶留一丁應戍於是度死節並著提學歐陽鐸立
祠祀之嘉靖十三年詔盡釋親屬之在戍者給其裔

孫王朝堂衣巾俾世世奉祀

劉簡字以忠歸善人永樂中以鄉薦為交趾諒江州判官時交人初附寇屢起諒江尤劇簡至宣朝廷威德百度修舉洪熙元年黎利叛攻剽郡邑所在皆奔降獨簡城守數月援兵不至城遂陷簡被執不屈死其弟及妻子七人死於井諒江民建祠井前祀之後祀於表忠祠

張微興寧人縣學生天順辛巳邑中賊起微慷慨請

自效從都指揮張通至程鄉遇寇挺身與戰斬首數級日晚賊稍退微進戰奮不顧身被執不屈而死

羅澄興寧人為縣里長天順間知縣舒韶出禦賊澄從行韶敗墜馬賊逐之急衆皆散盡澄飛騎至韶所翼韶上馬去自徒步走被執極口罵賊不絕聲賊支解而焚之

平子秀興寧人家居羅岡與諸賊巢穴近弘治癸亥賊煽亂子秀獨能畫策保其鄉又設奇誘致賊百五

十人皆斬之獻馘于官復請官兵盡滅其屬賊憾之
一夕圍其家子秀夫婦被執賊先殺其婦示子秀欲
逼之跪子秀厲聲罵曰死即死爾肯為賊屈耶遂被
害裂其屍

羅仲虺興寧太學生性剛勇正德己巳流賊陷邑里
衆莫敢抗仲虺奮激率鄉人往禦至白沙坑與賊鏖
戰以寡援被殺賊退其妻覓其屍歸葬之知縣智佑
親吊其喪酹焉

何算興寧人自少膂力過人耕稼樂善年八十餘被
恩詔賜冠帶體尚矍鑠正德間流賊突至其鄉居人
望風遁算曰老人不惜殘軀以報國且扞鄉里帥子
弟逆戰手殺數人賊畏其勇攢刃焉

陳大禮永安人為藩司掾嘉靖末賊起遂告歸築壘
積粟散家貲訓練什伍保全鄉里兵備道知其能檄
大禮同千戶湯勲討曾廷鳳戰於黃沙官兵却大禮
奮罵曰公等無鄉里妻子之念欺朝廷糜廩食大禮

敢愛生損威辱國力戰死之督府賜金祭葬立祠苦竹派

李槐長樂人常隆慶間聚衆數百以衛其鄉賊屠長樂七十有九鄉竟不敢入槐之力也後從副使王化擊蘇繼春於泉砂埔孤軍深入賊圍之數重槐短兵接戰身被數創死

張燦歸善人都司張榮次子生而驍勇有父風萬厯間嘗領兵征鍾陳巨寇生擒斬級不計其數軍至黃

牛渡遇賊力戰援兵不至歿于陣人以為不愧將種云

任宗武字元勲其先灤河人父道遠龔祖千戶職斬倭寇征河源長吉中心等寨有功陞惠州衛指揮僉事留家焉繼征岑崗賊首李文彪掃其穴擢四川都司鎮建昌衛宗武龔父職即領兵出碣石擒倭賊蔡雞五老上臺以將種嘉之署碣石衛三十年威名甚著崇禎四年河源巨寇猖獗宗武親冒矢石連戰皆

捷渠魁幾就擒忽為謀者所誤反陷賊伏中單騎衝
突連斬數級竟沒於陣宗武生平孝友俸入悉散族
黨族人聞訃皆失聲數日得其尸顏色如生子其璿
龍世職加陞都指揮僉事賢能繼之

右惠州府

莊璵字惇之揭陽人年十四遊郡庠弘治丙辰進士
宰安福性峻潔不阿每事必札記而行一稟於法或
以名謗難之曰三尺法如是吾知奉法而已創學舍

五十餘間以居生徒比考最䟽乞改教調國子博士
尋擢德府長史時宸濠蓄異志藐諸宗挾借祿米璵
持不與復禁絕其私交濠銜之陰謀構害璵挺身往
見詞色俱勃遂杖而囚之不食三日衣冠危坐而死
御史王完䟽其忠嘉靖改元贈太常少卿遣官諭祭
薛宗鎧字子修揭陽人登嘉靖癸未進士令貴溪調
將樂以才堪治劇移建陽剔奸裁費修學建橋又置
贍士田復考亭後嚴淹女禁尋召為給事中極論太

宰汪鉉儉佞鉉用微言激帝怒遂下獄杖八十五日而死隆慶初贈光祿少卿廕一子揭陽薛氏多文學而宗鎧直節尤著祀名宦鄉賢

謝君錫海陽人由貢生授福安縣訓導嘉靖三十八年己未夏四月倭寇福安君錫與教諭程箕分守大小西門間令人馳賊壘頗有殺獲面中流矢不為動賊攻愈急城陷箕巷戰死之君錫趨學宮具衣冠召集諸生申明大義拜廟觸柱死初君錫為諸生時與

修撰林大欽善大欽以養親歸尋卒君錫力存其後
其赴安福也潮陽林大春為文贈之曰其取友信者
其教人必忠斯知己之言矣

楊開字悅之大埔人天啓辛酉舉于鄉辛巳授湘陰
知縣湘陰為長沙上流賊自陝西入湖廣岳陽不守
將逼湘陰開請兵備之癸未八月張獻忠至湘陰以
火攻城開集鄉勇突烟而出拒賊于白鶴洞長沙陷
為賊楊天桂所執曳至望岡嶺越二日天桂誘之降

不應授以長沙知府開罵曰我豈汙賊官者得從屈
原遊幸矣乃挈妻子共六人同沉於湘江子州俊另
有傳

右潮州府

梁致育字遂初高要人通五經志行高潔以洪武癸
酉鄉薦厯建昌訓導六較文闡致仕家居嘗修郡志
天順二年流賊掠蓮塘致育年九十六且瞽被執賊
令講書厲聲罵曰鼠輩若曉禮義必不為此賊不忍

害以竹與昇之行致育知不免語昇者曰至選口深
淵即白我遂投淵死賊驚歎而去有竹屏稿藏於家
子磁應浙江鄉薦磁子瑜瑜子鏞皆舉於鄉瑜知來
賓遠安二縣有政聲鏞廉靜剛方篤於人倫仕至鎮
江府同知隨致仕歸行李蕭然家居屏跡不謁公府
太守袁載以賓禮迎之終不往

葉正字夢吉高要人由宣德乙卯鄉舉歷潯州鳳陽
慶遠府同知居官廉介以民事自任天順三年賊寇

慶遠圍旗山正督兵赴之賊不戰而潰掠者獲免賊
知正無援潛躡其後正反斫力戰子公榮死焉後兩
日賊合衆攻雞制等寨報至而都指揮黃鉞與知府
黃振方酣飲正請救弗顧遂上馬去督東蘭那地目
兵及民兵三百人往援抵柳青舖遇賊力戰賊叢刺
之與從子官慶兵民璩用和等二百人皆死是夜雷
電風雨大作雪深尺許賊大驚解圍去提督都御史
葉盛聞於朝制曰蘇緘擊智高於邕管偕子孫以捐

軀馬墜挫海牙於靜江胥將士而殞命正之節奚讓
古人贈朝列大夫廣西布政司叅議祠額曰忠義

羅成功字惟一高要人萬厯癸卯鄉舉謁選得永平
推官時兵餉叢雜成功綜核廉平三輔倚以為重秩
滿遷興化同知督帥留之崇禎己巳城破冠帶縊於
署中盧龍令鄧紹禹以聞贈光祿寺丞

右肇慶府

陳思賢化州人領洪武丁卯鄉薦授漳州教授漳俗

文浮於行思賢訓以忠孝禮義靖難詔至思賢慟哭
與其徒吳性原陳應宗呂賢林珏鄒君默曾廷瑞不
出迎詔即明倫堂設舊君位哭如禮郡人執送京師
思賢與六生皆死嘉靖中提學副使邵銳立祠祀之
配以六生

林雄符瓊茂名人成化初流賊四起雄與瓊倡率三
百餘人保障鄉里賊不敢犯郡守劉海賴其力城社
以完孔鏞繼至奇其才薦之僉事陶魯督府韓雍雍

召問地形兵勢慷慨明白乃給以冠帶命隨征已而
從鏞破遊魚寨平畬禾平羅村又破長塘兩營屢立
戰功兩人出入必偕率先登陷陣後中流矢被重創
嘆曰身不足惜但殘賊未盡滅無以報上人激勵之
意死有遺恨拔箭挺身鬪死雍嘉其義為文致祭俾
鏞與魯立祠祀之祠額曰義壯

邵夢何電白人任江西吉安通判署安福縣事崇禎
十六年張獻忠犯安福直逼縣城勢不可支解印綬

付僕逸出身效死守及賊登陴獲夢何至營以禮待之勸其降夢何曰城破矣吾有死耳竟不屈後以鄉兵外動疑夢何內應夜殺之於安福城外吉安紳士公請建祠祀名宦順治十六年復祀鄉賢

右高州府

檀昭靈山人以貢入太學有勇略景泰間盜起昭編鄉人為什伍籍其勇壯率以禦賊常獲賊級知府饒秉鑑令統民兵為保障與賊大小二十餘戰未嘗挫

初前後馘賊六百有奇後廣西龍山賊數萬流劫入境攻陷城邑守將先遁昭力戰死之藩鎮遣官致祭今祀鄉賢

右廉州府

文帶海康人騎勇絕倫天順中猺賊侵境率師禦賊每戰皆捷賊避其鋒後大戰于白沙坡被創死人咸哀之今白沙坡有義勇塚

胡松海康人自少孝友長以勇聞龔指揮使嘉靖中

海賊突至松赴海北道請給憑買舟募士督戰船捕賊於螃沙港身與賊戰鼓衆陷陣竟死於敵御史徐仲楫題請賜其子紹忠一級給田以贍其墓

柯有年徐聞人教諭懋之子補邑庠生性慷慨尚氣節嘉靖四年海寇流刦至村有年語兄扶其父懋出走以身禦敵而死賊退村賴以保鄉人立忠勇祠祀之

陳邦傑徐聞人隆慶初年海寇剽刦衆推為長六年

倭寇逼城衆洶洶不保邦傑出戰手刃二賊會賊衆大至遂遇害然賊氣亦索圍遂解

右雷州府

梁思泰瓊山人以父湖廣巡撫雲龍廕入太學登天啓順天乙榜判荊州尋轉貴陽同知督餉征黔寇義激捐軀崇禎十四年敘勲諡忠烈賜祭葬建坊崇祀廕子燮鼎入太學

右瓊州府

孝義

陳添佐新會人五歲失怙與季弟添佑育於繼母元
末盜起奉母逃山澤間陷賊中母子闊絕者十年添
佐每思母輒哀哭賊憐而歸之見母於樓岡羈困桎
拾以養至洪武初始與弟奉母還鄉縣令舉孝廉不
就治喪一奉朱子家禮叅以鄭氏家規時南海李真
佑避薦而來微服為傭人不識也添佐延至其家相
與訂為家式百條及三省九思十戒訓其家鄧林為

作月溪處士傳

朱壁清遠諸生丁母憂泣血三年未嘗見齒與諸弟
同爨四十餘年錢帛不入私囊洪武二十四年貢入
太學官至工部主事督理營繕以廉勤著聲祀鄉賢
梁惠生東莞人洪武初其兄惠養得重罪當解京即
刑惠生曰兄承宗祀弟請代死遂械繫之京就死

湯有容名載以字行新會人洪武丙子鄉薦教諭興
安聞兄喪即歸養後以母命復教諭容縣時大疫縣

令彭清將危人避去有容力左右之無何疾愈人比之庾袞云

梁孟祥順德人性至孝永樂初父以吏長流口北孟祥甫四歲攜至牆屏下語之曰吾行恐無還期兒別我矣父果不還祥自後歲時泣拜於牆屏下歲久牆壞人令毀之祥不聽曰是猶彷彿見吾親也年甫壯喪妻亦不復娶

金誠字誠之番禺人尺籍繫廣州右衛讀書社學揮

使麻張最無賴遇諸塗詬曰軍餘乃敢效儒生耶褫
其衣使薙草烈日中稍緩則撻之誠泣曰讀書冀顯
揚今且虧體辱親矣張怒併逮其父窘辱之予金乃
免永樂丁酉誠領解首明年登進士授工部主事尋
轉刑部會張奪人貨逮至京師命誠鞠問張自危甚
誠執禮如平時竟平反之誠性易直不事表暴嘗侍
永樂北巡同行者視其舉動朝夕未嘗失尺寸蓋敦
樸人也正統初以疾乞歸有詩集行于時

唐豫字用之南海人

今順德

父奎見忠烈傳豫少從孫

貴遊作詩文有古法痛父非命建蓼莪亭以自傷嘗
定鄉約鄉人世守之子璧亦有文行母病瞽璧朝夕
親飮之後目復明公卿多欲薦辟輒以母老辭雖炎
暑未嘗去衣冠訓誨子弟必端立正坐然後授以句
讀或以為迂曰文藝末也不收放心何以教授其敦
行若此

容悌與字行白香山人學博行修永樂中以明經署

師儒士大夫咸重之。居家有禮，謹祠堂之制，嫁宗族
孤女數人。母陳氏病癰，悌與躬親湯藥十三年，無懈
母歿，哀毀踰禮。邑人稱為孝行。先生善書，工吟咏，有
雲嵐集。

何潛，淵東莞人。少從羊城張仲璧學。旅館夜分，忽有
少姬窺牆遽斥退之。洪熙初，知縣李正舉經明行修，
薦於藩司，以親老辭歸。居喪毀瘠三年，茹酒肉與
兄潛珍頌白，猶同財產。年八十五卒。

鄧珩順德人正統己巳賊至其鄉焚掠珩父遇害兄弟奔散珩負母麥氏避難過烏柏涌遺刃傷足不能行賊殺之數日面如生兩目下有淚痕見者異之云洗二順德人與兄俱孤貧不能娶兄年五十瞽二取魚蜺為養丐得餒餘必先以奉兄寒則分衣十餘年不衰兄死哭甚哀不能殯鄉人醵錢厝之

張善昭字彥光順德人天順壬午舉于鄉授兵部司務大司馬余子俊甚才之超拜四川僉事以忤臺臣

謫鳳陽通判轉臨江時魏安生等八十四人隸尺籍
皆練子寧肺附善昭上言子寧忠貫古今太宗謂子
寧在朕當用之昭帝亦稱方孝孺等為忠臣既忠之
矣何外屬尚以奸惡流配百年不宥哉乞復其家書
奏朝野壯之尋致仕初天順癸未南宮火友人劉琮
死焉善昭於煨燼中得其遺骸歸葬在成均時同舍
趙蘭生貧且疫人莫之顧善昭頻視之蘭生垂絕叩
枕謝曰螻蟻何足累君君自愛比再往已卧於地善

昭撫其心尚溫復舉於床越數日乃愈明年蘭生登進士德善昭禮事之終其身焉善昭周厚本支及其鄉人所居旁舍無凍餒者布政使劉大夏嘗單車遠訪信宿乃去孫潔另有傳

陳晟字美宣番禺人少孤貧同郡鍾定者育為子遂冒其姓舉天順壬午解首後四年成進士改庶吉士將授官抗疏請復姓歸葬詞甚哀惻報可歸而事定禮敬畢至後定知其復姓大詬晟衣冠請杖至流血

終不敢起定亦感悟相好如初拜戶部主事歷郎中
出知雲南臨安府剖斷如流熨人讐服除冗費以萬
計黔國公索歲饋晟執其使囚之自是無敢干以私
者未幾卒於官晟妻黃氏鍾族義女鄉薦時尚未婚
富室欲妻之不許比黃卒甚為傷悼陳獻章重其為
人

容師偃香山人悌與四世孫自少性純孝父罹癰疾
兄弟六人惟師偃朝夕侍側正德丁丑寇掠其鄉人

各棄竄師偃負父而逃賊追之急父麾使遁師偃不肯去泣曰父子相為命去將安之俄而寇至俱被執縱火焚其父師偃泣曰父老且病請以身代寇舍其父遂就焚死時年二十一父哀慟設祠置田祀之

陳凱南海人世家九江堡兄弟八人立宗子為家長數百指同爨內外無間言冠婚喪祭一循家禮耕農商賈各事其事鄉人稱其室無私繒索無私錢比之

義門鄭氏

霍任字尹先南海人少同兄韜讀書僧舍衣冠相對
即暑夜不改人服其端莊兩試不遇遂潛心理學父
母歿哀毀成痞廬墓西樵遂移家焉兄方厯顯要而
任泉石自娛然赴人之急甚於其私有被誣殺人者
未嘗識面輒為雪其冤其人後致百金謝揮而不受
歲祲令家人減食以賑有兩田叟鬪乙不勝毀甲先
隴甲將訟於官任諭之不聽乃為修其隴具酺醕奠
之甲驚曰田叟何以當此遂不復訟棲西樵垂四十

年比卒聞者莫不悲悼所著有心性說解宙山刺言
羅萬里字一鵬順德人為諸生事親孝與弟萬程友
愛男女四十口同爨邑中立社倉萬里首捐穀百餘
石後饑又罄困以賑御史楊以誠知縣曾仲魁俱表
其門至崇禎十五年御史柳寅東觀風於順旌曰嶺
南孝子子孫即其廬為家廟在錦巖之西麓今祀鄉
賢

關祺棧順德人早孤與兄祺祖弟祺和相友爱正統

已已攜母避兵及賊平家用不給祺穢與弟經商以
養母每事必咨稟于兄一錢不入私橐尚書張泰為
鵲鵲歌贈之子孫守其訓三世同居成化甲午祺穢
商于陽江隣賊驅掠男婦幾三百人欲奪商船以濟
穢多力有膽氣率衆商挺刃逐賊賊不能渡悉奔散
被掠者皆得免

鄧儒震順德儒生師事湛若水事親以孝聞夜遭盜
妻子脫走獨母被擄去儒震詣賊求代賊歸其母縣

令胡友信聞之並合東莞兵勦賊兵戈搶攘被擄者多傷殘而儒震竟得全歸人以為若有神護

阮珩字國用順德人居喪哀毀骨立督學潘府行部至見其文欲廩之以未預試義不受諸生上其行府撰四難文旌之又同邑余尚卿性孝為高才生行潔好施嘗為人直誣而却其餽不較侵地人稱長者子光裕嘉靖乙卯鄉薦歷左長史居官廉正所至有遺愛

李悅字子喜新會人天性孝友年七十念及父母輒
流涕長兄七子二十餘孫產薄不能自給招與同居
以已產均之族人多來依者至百餘口庭無間言所
居臨海颶風作屍棺漂泊悅皆收而葬之同邑李翔
順德嚴竦俱以孝友稱翔嘉靖癸未進士授衢州推
官以母老留家人事之止攜一僕以行尋擢主事欲
改南迎養或止之翔曰近思老母夢魂飛越遂請歸
抵家七日而母卒人謂孝感竦置祀田捐產贍兄邑

里旌焉

陸任忠字希旦南海人正德丙子舉於鄉厯知清流縣居官六載不隨家累以廉靜稱轉梧州府同知時議征安南理餉有功受金幣之賜倅梧八載以持正忤僚長輒棄官歸積俸置產與二弟均之二弟議曰兄三子吾兩人皆一子豈可使吾子之產三倍兄子乎且拮据自兄宜析產為五兄弟議讓鄉評重之同里羅汝涇厯仕知州父遺產數百金盡讓其弟自甘

清約亦以友愛稱

朱以藩清遠人孝友尚義歲饑鄉民盧姓者鬻其子
晝夜號泣以藩出金與贖之舅表紹修歿遺幼子弱
女以藩為之庀喪具畢婚嫁隣族多蒙賙卹以貢為
龍溪縣丞有廉惠聲卒于官次

容璫字廷桂新會人性質魯早失怙每奉遺物輒泣
不已遭盜火其居惟遺物幸存其孝感如此以貢至
京以母老陳情終養母喪畢復入南監祭酒費家尚

書湛若水交薦嘉靖初廣東布政使李中以聞詔旌其門後授遂昌主簿時南海有陳傑者以孝行稱御史姚虞督學蕭鳴鳳竝旌之

梁津字濟甫番禺人幼有至性事母區氏以孝聞李弟庶出尚幼所生母素悍盡奪財產以私其子津畧不介意撫之益厚嘉靖甲午鄉試第一辛丑成進士仕刑部主事迎母就養以學行改吏部時大瑞麥福最寵幸以同鄉求見津善辭之福亦服其素履不訝

也循資當轉文選司同僚有越次求得者津即讓之
衆皆服其量卒於官年三十有五母區一慟而絕聞
者莫不盡傷家宰素重其賢憫其貧率僚屬致賻護
二喪歸

鄭應新字孟元順德人宋主簿漢章九世孫也父翼
瑞金令晚年遭奇疾藥弗效應新百計療治疾遂瘳
應新久無子年七十五始生子用淵以鄉薦仕至通
判

鍾雲祥字天兆東莞諸生執父喪哀毀骨立結廬墓側哀毀成病母強之歸居宿外舍如是者三年督學章拯旌其門未幾病卒督學魏校遣官致祭且立碑表之

陳絢字衷素東莞人應辰十三世孫性峭直不能容人過朋友或少踰禮唯恐絢知讀書道家山足不窺戶者數載邑中子弟相率師事焉隆慶庚午舉於鄉赴春闈不第歸與其徒誦說不輟蓬室蕭然不干有

司然喜論時事利病民有冤抑每代白之倣宋范仲淹法倡置義田年四十卒邑令楊寅秋給地供其祀事同邑袁以芳乙卯舉於鄉亦以古人自期動不踰禮與絢竝重鄉評

李浩花縣人生而父歿其母劉氏以節孝聞浩事母孝謹及長教授以供菽水年三十貧不能娶里人歐陽光慕其行以女妻之未幾浩卒妻亦守節事姑曲盡婦道隆慶五年御史楊標列狀以聞詔旌其門曰

節孝之門

黃觀英番禺人事母至孝家貧四十不娶人勸之曰
不欲分母食也每辰出賣菜先具溫湯及食時則在
市肆具精飯魚肉奉母而後自炊珍果嘉蔬必以進
率以為常比母卒後始娶妻舉一子尚書湛若水恒
給之粟有司表其廬

何功右字元理順德人生三月而孤母李氏守節育
之功右有至性稍長問父容貌見遺書輒涕泣奉母

極懼未嘗離左右母病籲天求代居喪哀毀著苦思
錄以寄哀家中產芝九莖甘露降於庭人謂孝感萬
厯丁酉御史劉會以聞下詔旌之

劉聯騶字佩甫南海人由恩貢授懷集知縣鄉居值
山賊流劫母李被擄去聯騶持刃追之手刃執母者
母得脫而聯騶被賊殺死聯騶妻葉氏守節事姑以
孝聞

岑徽字理猷南海人賦性孝友少業儒不售遂由吏

員授職主簿以修殿勤勞為冢宰施鳳來所稱鄉居多行善事嘗貸金於人貧則焚券里中婚喪賴其賑給朋友無後者代為治喪施藥治橋刻迪吉錄風世鄉里稱為善人卒年七十有四著遺訓二十條以誠子孫

李敬問字翼東南海人尚書待問同母兄也授光祿寺署丞少遊燕趙豫楚吳越間博覽有才志見兄弟竝登仕籍遂壹以養親為事年五十母喪哀毀廬墓

訓子姓甚嚴撫孤姪若已子里人彭毓吾寢疾屬其
二子并橐中六百元敬問為之治生延師教之後俱
成立丙戌海寇披猖敬問樹柵鑄礮簡練鄉勇以扞
村堡戊子歲饑蠲產乞糴以賑餓者所著有嚼蠟篇
卒年七十有八子象豐領鄉書孫茂甲子副榜萼庚
子副榜能世其家

趙響字心極東莞人宋進士必璩九世孫也必璩元
孫鐸著性道管窺諸書鐸孫壁常同王守仁講學響

夙承家學蚤從鍾昌授毛詩既而師事楊起元起元問性有動靜乎曰有動有靜者心無動無靜者性問知能曰知善知惡是良知為善去惡是良能知孝知弟知之至能孝能弟行之盡起元然之授以羅汝芳識仁編自是朝夕體驗踐履益實生平學力以禮教為宗性至孝事親備極色養殯葬誠信屏絕緇黃三年不入內室祀先吉蠲拜獻肅如也推愛族黨貧不克婚葬者助之丙申歲祲賑粥逾月萬厯乙巳以明

經薦於朝所著諸經酌言嶺海志畧文廟崇祀志諸書

鄭國相字鳳陽順德人宋主簿漢章十一代孫性孝友博極羣書屢試不售授徒清遠四十餘年邑之士盡歸之鍾萬祿鍾自得其最著者先是清邑侈靡每讌飲侍姬盈左右國相必訶禁之否則拂衣去邑人懼其嚴正俗為一改二子昌烈昌緒皆績學澡行卓有父風長孫啓中庸歲薦為舉名宿次孫際泰康熙

乙卯舉於鄉登進士入翰林人以為碩德之報

黎堯賓字賡堂南海諸生事親孝謹有經濟才崇禎間邑令奉檄治馳道將壞民廬舍人情震動賓侃侃白于當事布政使王世德榜示曰路循古道無容遷改第令甃築而已由是公私便之性喜排難解紛周恤鄰族卒年七十有二其繼室譚氏年至百歲五世一堂人咸嘆羨

余帝選順德人孝事二人無間言丁內艱三月食粥

暮年蔬食水飲生平以操行自勵不入公門性好施
嘗捐地以舉喪之未葬者自少為諸生困於棘闈晚
年隱居教授所著有四書秘義

林清字壯生南海人少喪父事母至孝父妾生弟方
九月清撫育成立已所置產悉均之叔玉房貧無業
鬻產八十金與之舅氏有女早失怙恃資其婚嫁生
平行善甚衆屢試不獲雋年五十三卒子挺芳庚戌
歲薦

衛冕番禺人部授經歷性剛直務勤儉歲饑捐資賑
隣里收道旁棄兒多存活遇山寇死之子文英中書
舍人

右廣州府

蒙景澄仁化人母病稽顙告天求以身代父患疽時
以口吮血居喪廬墓弘治元年縣令邱墩上其行督
學蔡克廉表之

駱堯知字君舉樂昌人性至孝少為諸生有志道學

歲當大比適父病輒不應督學余本移文督之勉就
試遂中選在太學時祭酒程文德甚重之呼為老友
鄧魯樂昌人壯年喪偶不再娶以歲貢授端州訓導
俸入悉均兄弟丁內艱廬墓哀毀遂不復仕崇禎間
御史張守約表其門

白雲端樂昌人以明經司訓澄邁性至孝少時為父
吮疽父賴以安

王勳環英德人賊劫其鄉賴氏驅掠男婦日中未散

勲環率其三子往救手斬一梟賊衆乃奔竄因格鬪
被重傷勲環尤甚病創三日皆卒急隣之難至于父

子相殉鄉人表其閭曰一門孝義

按孟子云守望相助至于父子俱殉

似過矣意父勇于救隣子急于救父事勢所激因而併命具有異于鄉隣之鬪歟抑仍為傷勇之死歟

右韶州府

陳禮恭保昌人家尚淳樸規範整肅宋嘉定初遠祖
公祐與弟汝賓同黌至成化中禮恭遵其遺矩不變
厯年三百傳世十二食指百計內外雍睦無間言知

府江璞躬至其家題至和堂以美之弘治壬子知府
林符以狀聞加獎勸

鄧必昌字希文始興人幼失怙事母至孝撫弟必隆
必顯友愛嘉靖丙辰昌以貢任秀水丞居官三載致
仕歸養御史榜其堂曰崇孝榮歸居母喪哀毀骨立
力行古禮嘗作家訓以遺子孫至今世守焉

彭憲祖字東井弟懋祖字似石始興人孝友敦篤親
喪哀毀幾絕既葬廬墓忽一夕有巨蛇入其廬俄而

霹靂驟震蛇躍出殛死士大夫聞而驚異謂純孝之感嘉靖間憲祖為漳州府司訓懋祖為廣州教諭陞陸川令旋乞歸終養懋子際盛仕至鄜州同知

李維喬始興庠生繼母病衣不解帶者百日後二親卒廬墓三年哀痛不已萬厯間邑令李自白旌其門賴綵字子新始興人萬厯間以歲薦任河源訓導遷新會教諭即乞歸事父母以孝聞及居喪恪守典禮生平多所著述人師事之

右南雄府

陳範龍川人早喪父事母以孝聞永樂乙酉舉於鄉
歷官麻城教諭衡州教授奉母就養承順備至自製
戲綵詞昕夕歌之秩滿乞歸終養後遷唐府長史思
親不置王察而憫之為請追贈之恩大學士楊榮嘗
贈以思親詞三章

李士軒字尚志博羅人成化中以鄉薦訓導萬安親
終聞訃重趼奔喪朝夕哭奠既葬廬墓側詔旌其閭

官終壽府紀善

何字新字子完博羅人父涵蚤卒事母甚孝母卒水漿不入口者七日號泣不絕聲比葬負土成墳廬墓三年有翔禽馴虎梅實竹花之祥詔旌其閭弘治己酉舉於鄉歷官宗人府經歷

袁賓字尚賓歸善人弘治乙卯賊掠其鄉賓奔逸俄聞繼母俞被執乃詣賊請代賊從之官軍追至賊怒縛賓於樹以劍擬之終不忍害後仕終建陽訓導

徐春芳和平人其祖為賊所殺誓不共戴嘉靖中興兵擊賊春芳謂友人曰吾行矣其友止之曰子娶明年始有女盍少待生男乎芳指曰曰吾不料吾躬敢卜吾後乎遂杖劍詣軍前爭先赴敵死焉報至其妻曾氏收簪珥遺其姑抱女一慟而絕

黃讓字遜齋永安人工詩善書本長樂儒生也年十六父母連沒讓廬墓三年其兄為賊所得讓罄橐三百金贖之未幾賊葉千復掘讓父母冢取其骨責贖

千金讓弗能辦乃以身質賊易其親骨歸子啓愚啓
魯假貸親友無所得啓魯乃走賊壁曰吾家所有者
田耳非家長操書券田不得售願代父歸賊然之讓
從問道歸又為他賊所執葉千以讓久不至繩貫啓
魯鼻困苦之啓愚無計贖父與弟晝夜號哭諸壘賊
哀之念留質無益乃釋讓與魯讓奔訴督府吳桂芳
請立縣以鎮壓賊衝桂芳疏上得請隆慶四年檄林
天賜城永安命讓督役四月而畢藩臬交旌之是年

讓率二子將鄉兵殺賊劉漢江明年擒賊蘇允山啓
愚被創死知縣陳哲葬而表之又明年督府殷正茂
大舉討賊讓散家財募死士百人從監軍道顧養謙
為先鋒與永安令陳立中分道招諭至南嶺賊江萬
松堅壁七日讓身入賊巢誘之官兵乘間入啓魯以
父陷賊大呼先登奪讓歸啓魯力戰死讓前後勦賊
出奇制勝凡斬賊魁六擒帥二說下賊巢四俘獲一
百五十降者一千七百有奇計功最然為人謙退志

在報椎埋之仇故身陷子殲不顧每有功推與同事以冠帶哨官終連舉鄉飲賓卒年八十一萬厯三十六年詔旌其廬曰一門三孝父子皆有專祠

葉肯字允中歸善人年十五補諸生性孝友父被誣繫獄肯請代三月疾作其義弟復請代郡守陳祥聞而嘉之嘗師事薛侃於西湖聞良知之旨著大學解魏珏長樂人兄理誤殺人官捕之珏以理無子匿之自陳曰殺人者珏也鞠之不易斃於獄

馬叔康河源學生性孝友父卒哀毀廬墓比報祖喪亦如之後廬母墓有白燕之祥萬厯戊戌旌表

韓鳴鳳字伯儀博羅人萬厯初鄉薦父任邵武訓導鳴鳳奉母之官卒撫州罄資扶櫬歸既而父卒於閩既葬守墓哭泣有翡翠巢簷阿巨鳥集門外人目為孝感後仕高郵知州河嚙民居捐俸拯溺掩骸以擒治巨猾忤郡守改知沅州發倉賑饑振刷諸弊給餉皆足額戍士人人自奮後解職歸故廬築永思亭忌

日必持服吸粥執終身喪生辰適當母諱垂老未嘗受觴祝以子日績貴累贈禮部右侍郎

缺鳴鸞字伯雋博羅人年十三從父謁選每夜數起視衾枕父司教淮安病亟鳴鸞衣不解帶目不交睫以侍紳士為詩贈之生平一言一動不敢忘父母顏其室曰敬遺堂以誌永慕

羅大魁海豐諸生其父為賊所害大魁嘗切齒萬厯癸酉大征大魁請以身嘗賊伏兵邀擊督府義而許

之賊果墮計中大魁歿于陣妻李氏見列女傳

林一喬長樂人家貧多方營甘旨母疾與弟一桂禱
天願以身代母疾尋愈後一喬病季弟一櫝亦篤友
救兄云

王元賓興寧庠生流賊劫安明寨元賓叔父時在寨
中父命往援之元賓與賊戰斬首一十三級力竭被
殺其子名世終身不飲酒茹葷事母以孝聞人哀
其志

羅萬象興寧增廣生孝事二親問安視膳動遵古禮
親疾衣不解帶奉刀圭惟謹親沒蔬食齋衰三年或
以小祥大祥寬譬之象曰吾弗忍也

歐大聰龍川人母邁疾朝夕虔禱親治湯藥數月不
倦母終哭絕方甦廬墓三載寒無重衣徒跣骨立山
寇過而悲之開府獎曰明經孝子

歐治龍川人為親百里負米父母死皆廬墓三載泣
血殮風有虎馴蛇伏之應

王依興寧人年十八郡縣試冠軍將應督學試聞母病心痛即買舟歸親以機不可失為言一依曰如無人心焉用青其衿及執母喪形毀骨立服闋補邑庠督學楊某以孝無間言旌之

李天楹興寧人事母至孝母患痿症僵卧十餘年天楹年將七十常服役不怠凡事必躬親不假妻媳母死蔬食廬墓三年邑舉鄉飲賓

駱兆運龍川人父病嘗父血溺以察症候知縣孫徵

奎獎其孝行年至八十餘

右惠州府

林祖字述古潮陽人少孤貧從學張與元季挈家避
亂行遇獠賊母莊氏與弟進皆掠去祖追之不及旦
暮悲慟籲天誓曰不得吾母奚用生為明興山海底
定祖微行山中至程鄉犬吠峯見焉抱而哭獠人阻
不與潛訴於官遣吏偕往贖之中間十四年矣洪武
三年舉明經以母老乞終養十三年復舉孝廉赴京賜

衣九襲鈔五百貫授四川巴縣丞以廉能聞陞河間府通判

林希蔭揭陽人自幼能屬文博通經學尤精春秋父客死貸錢歸葬奉母甚謹母歿廬于墓有白鳥來巢蟾子千羣聚楹三日妻亡不再耦與潮士林厚善俱以孝聞永樂間同舉孝廉希蔭謂厚曰君幸親在宜祿仕余祿不及親矣奚仕為厚舉進士累官叅政希蔭終不易志天順間海寇行刼過其門大書曰此林

先生廬也慎勿犯嘗一日出遇賊希蔭衣冠坐舟中
賊識之避去族兄與鄉人訟郡守不能決以問希蔭
涕泣言曰誠不能化族黨非善也證父攘羊非直也
守益賢之著二十四孝七言歌令童兒誦習季子巖
性剛介行義著於鄉不替父風

葉文保程鄉人好義知書痛父死於賊誓必滅之常
戮力殲賊洪武十四年縣吏陳伏勾引三饒賊首隆
海攻城城陷文保馳告府衛平之二十年復領民兵

討安遠賊有功被掠者悉辨出之其保障邑里功勩居多

周孝揭陽人少孤問名於母曰孝喜曰吾求為孝子雖不讀書可也家甚貧力田以養母朝暮必具衣冠拜母以為常歲旱屢禱不應或謂當請孝子禱之禱曰天如不雨孝將自焚言未既大雨如注民賴有年稱為孝子粟

周則義揭陽人早喪父力耕養母旦夕無惰容遇江

鮮野菽必力致之務貽母溫飽已身不免饑寒妻有
嘔言遽去之母卒無葬地或捐田一區與之曰以優
孝子既葬廬墓三年

翁孟統揭陽人事母孝定省不廢母患失明孟統夙
夜禱天舐之以舌數月母目復明

鄭璣字文象潮陽人幼失母已復喪父獨與繼母及
二弟居二弟者繼母出也母篤愛之璣務順其意長
欲析產璣輒以良田佳器與之母為感泣復同居如

故璣舉正統丁卯鄉薦署教靈川轉寧波教授入為國子學正卒于官幾無以為殮其清苦乃天性云

黃濙字元浩潮陽人少時父以解運客死于虔不能歸比長母告以故輒痛絕歲時薦奠西向哀號領景泰丙子鄉薦母亦尋歿乃走虔州歸其父骨合葬焉服闋授沅州學正改萬州貶漳州訓導卒于漳士人哀之其時劉軒亦以割股療母病里稱其孝

李大綱字弘舉海陽人清修苦學早喪母事父以孝

聞父歿水漿不入口者五日廬墓三年著家禮易覽
一書以化鄉人成化丙子既領薦以榮不逮親不燕
鹿鳴士論重之生平樂易喜周人之急嘗一日道逢
餓者垂斃扶至家食之不問其姓名他日來謝笑曰
一飯何謝為

林濟民海陽人弱冠時母病篤強命之娶婦至門而
母卒足不入幃守苫次哀毀踰禮及葬廬于墓服闋
始合卺鄉邦稱之領成化丙午鄉薦授龍巖教諭正

身範士陞贛榆縣有廉惠聲卒年六十四祀鄉賢

李方饒平人少孤事母至孝定省無間家貧業漁以
美者供母餘乃鬻之口不二價成化甲辰颶風怒濤
方所居蕩析負母出無所避子母皆死收其屍尚負
持不解邑令張濬為之治殮且旌其事

王賓揭陽人椎魯少文家貧以孝養親父歿未葬值
颶風作海水震蕩賓抱父棺號泣隨風飄逝俄反風
棺泊岸旁人以為至孝感神嘉靖六年有司覈實疏

聞

徐嘉祉平遠人由歲貢授龍南令九歲執母喪哀毀如成人繼母性嚴善事之賊黃鋪寇其鄉嘉祉負母避山中道遇賊抱母跪泣願兒死留母賊異之問其姓名曰素聞君子遂釋之待異母弟友愛尤篤分產業悉推善者與弟尋蕩廢又捐已產與之令龍南有廉名歲饑捐俸賑民多所全活旋乞休歸設教家塾學者宗之

黃良豐海陽治家子性至孝每入見父母色不怡輒奉簋跪請執父喪三年飲水素食旣葬結廬墓左夜則就廬日則嚮治養母縉紳家或遺之食輒歸以遺母後居母喪有倭寇抱棺哭曰母無恐良豐夙夜在此倭感之不為害逮葬復廬墓如初郡縣以聞督學旌之

周孚先字克道潮陽人居近薛侃之門篤志聖賢又從湛若水於天關其事父母就養無方出入必告待

金史卷之八十二
弟友愛教子以義若水亟稱其孝居桃谿山中所著
有桃谿吟藁以子光鎬贈四川叅政

莊淑禮胡世和潮陽人嘉靖中倭寇攻城二人應募
守禦倭以雲梯十道攀堞而上二人奮擊斬數十人
賊退身被重創猶躍城下追賊中砲而死淑禮之父
撫而哭之曰兒死城完是死而有並於潮陽也復何
憾因令其少子乘城擊賊以報兄讐聞者壯之

陳添桂海陽諸生莊涖之家僮也涖之家故饒隆慶

間賊林乾道破東溝寨大索莊生莊闔門藏複壁中
添桂被獲詰主人所在曰入郡矣賊怒斷其兩臂終
不肯言乃斷其首去泣之從複壁中備聞其語哭之
慟葬以子姓禮歲時祭之

右潮州府

梁東之字宗海德慶人舉弘治辛酉鄉試仕仙居令
祖母溫病痢中裙廁踰身自浣滌兩月不懈初放榜
下第者哭東之亦歔歔人問之曰幸得錄於主司而

親不逮是以悲耳友於諸弟里人稱之卒年八十有

二

鄧墻字伯藩德慶人以歲貢為高安丞溫良慈愛士
民悅服嘗主上供有羨金數百歸之官當道賢之醉
人遺金五十於其門次日倚門而望其人至即舉以
還未嘗啓也卒年九十有五

陳立德慶人曾祖文仲為元萬戶父宗錫為撫猺舍
率徭入貢因事之遼遂不返立七齡自知讀書既壯

告其母曰父去久音問不通若不訪求天地間一罪人也聚糧走燕趙書姓名情狀於衣背日詢訪之至開平中屯衛遇一父老攜至家出其父所作樂靜遺稿因獲殯所立齧指滴血而骸果滲仰天大慟絕而復甦乃負骨以歸禮部侍郎陳璉作孝子傳以傳

曹昌字德隆其先壽州人祖承宗德慶千戶父斌好遊往來汴洛許汝間久而不歸父去時昌甫三歲及長問其母曰吾父安在母告之故昌大憾既娶婦生

子以家事付其弟遂辭母去誓不見父不還乃趨河
南之遂平得館人告之曰而父有妻子攜以歸久矣
昌旁求不得困於塗每夕稽首北辰願減算以見父
行至裕州遇父友倫濟始知父已死矣訪獲殯所朝
夕號泣水漿不入口裕人憐之聞于周藩賜孝子詩
命長史潮陽鄭義傳其事已負骸歸葬哀毀踰節人
稱為曹孝子

植以進開建人目不知書先是父母因貧徙石竇山

中耕樵父早喪事母梁極孝樵採所得悉以奉母食
必跪獻母命之起乃起隆慶間山寇充斥以進負母
入深僻鑿土室歲之數日一易其處恐賊蹤跡之也
定省跪食顛沛不變時高明嚴貫事母至孝常服勤
左右病則叩天請代喪葬盡禮制府並旌之

何真字嵩山高明人三歲失怙恃喜讀書以父母不
見為恨遂絕意功名每食必慟終身衣縞食不兼味
學者稱為一味孝子宣德中郡守王瑩以狀請乃旌

其門

簡直新興人邑諸生居母喪三年不離苫次食必齋
素臥不入內感靈芝之瑞邑人彭津為之記學使者
王璽旌之

譚舜典字帝則高明人為邑諸生嘉靖癸亥新興恩
平賊掠丙洲舜典父獲焉走入賊營云願代父歸乃
得贖金賊許之旬日同知呂天恩捕賊至楊梅都賊
戰敗舜典得脫歸時被掠死者無數獨舜典父子俱

存人謂孝感

歐陽念高明太學生崇禎五年流寇薄城身率鄉勇與賊對壘生擒賊首蕭阿四邑人賴之

右肇慶府

吳中綸茂名人孝事父母及親沒撫二幼弟中時中述教養彌篤後俱仕學有聞子六人咸補博士弟子嘉靖壬戌督學張希舉旌之

梁琚字國器茂名人善事繼母及異母弟幼失母撫

教若子以已業之半讓之由貢厯德府長史乞假歸省墓遂不復仕清介自守鄉評甚重之

馮宸字元樞茂名人年稍長知承父母懼為學生所得廩餼悉供甘肫伯仲有難身救之太史程文德稱為高第弟子由貢選上猶訓導奔母喪以毀卒

吳世紹吳川人事母孝母病瞽行哭求醫時以舌舐目目尋復明一日採薪江南聞母暴病乘筏而渡竟溺焉人共悲之其後子廷彥領萬厯鄉薦

李彭年電白諸生父一鰲遇倭傷重扶匿山中彭年聞人肉可治乃割臂肉調羹以進父歿哀毀成疾死其妻黃氏亦死其姊適吳者亦以死節著見列女傳吳稟純吳川人孝謹端厚時大疫其祖父母及父母均臥牀褥骨肉多畏避去稟純夫婦獨留嘗藥浣衣既而病者相繼沒數喪並舉隻身任之疫竟不及其身值歲饑覓升斗必分伯仲後以明經仕感恩教諭

右高州府

鄭龔石康人父賜正統初以春秋魁嶺南仕蒼梧訓導兄龍進士龔生而穎異天順壬午母謝為流賊所掠時龔年十六挺身入賊壘給之曰吾欲丐吾母豈惜金第吾年幼不知母藏金處母歸必來贖吾賊以爲然拘龔而釋其母然其家實無從得金也龔既脫母言笑自若官軍至賊遂害之嘉靖十六年知府張岳聞其事請於御史陳大用就龔所居梁村建祠祀之復建烈孝坊于永安所旌焉張岳為之記

翁爵欽州人嘉靖元年歲貢任太和訓導擢永春教諭板輿迎養得俸以具甘肫立教以人倫為本取文公家禮與諸生講習陞福寧學正卒

施敦合浦人性純謹自束髮至白首未嘗與人爭事母至孝母得目疾竭誠祈禱常以舌舐翳久之母目復明人謂其孝感母年八十餘終敦年六十執喪盡哀廬墓側三年

孫應勛合浦人性穎悟有文學事父至孝每先意順

志怡顏不懈以貢厯官府教授絕口不言修贄教士
以敦行為先歸家友愛其弟遺產相讓鄉閭推其德
望

李國華靈山人嘉靖辛酉與父元和販穀歸經博嶺
山賊殺其父國華痛憤矢志復讐持刃赴鬪為狼賊
所傷而死

右廉州府

陳時雍海康人少失怙事母至孝友愛其弟無間言

貧苦力學領嘉靖乙酉鄉薦操履儀度有先輩風後
進多出其門時珠池太監趙蘭恣行剽取民苦之時
雍具陳當路蘭竟奉旨革去弟時亨領廣西辛卯鄉
薦能友於兄生平與物無競鄉人有構爭者輒相謂
曰何不學時亨兄弟並祀鄉賢

陳應魁海康人為郡諸生自幼以孝友著太監趙蘭
鎮守珠池奪民間產業應魁父亨有富名被逮笞榜
不堪應魁痛父將危往代其父蘭竟加以炮烙之刑

遂死士大夫為詩挽之

吳雯海康人恬靜博學不俛仰于時事寡母劉怡色和顏扁其堂曰愛日當路欲辟雯以養母不就著家範宗譜士大夫皆稱其質行云

張能海康人弱冠教于鄉事寡母至孝督學趙某按試特嘆獎之令補郡庠生不願就時論稱焉所著有朴庵集

顧汝鐸雷州衛人補諸生試必前列與兄汝鑑相砥

礪竭力襄三世之喪更以及親族之未葬者督學屢
獎由選貢入太學歸而購書摹古未竟其志而卒

吳大謨海康人父鍾由歲薦入成均歸得目疾大謨
多方療之清夜籲天願減已算以瘳父卒不愈大謨
與妻李氏先意承志父嘗撫其孫啓聰曰而父母事
我至矣吾瞽無以貽汝願汝以父母之事我者事而
父母則莫大之孝也鄉人翕然稱之子啓聰孫良仞
俱以文行著聲

陳文彬徐聞人天性孝友登嘉靖甲子廣西鄉榜知
隨州歸俸橐悉均之親族時錦囊兵變賴彬調之得
解

駱效忠徐聞人舉萬厯戊子鄉薦任鬱林知州為政
清簡轉滎府長史歸以先世遺產推予兄弟復增置
義田贍宗族之貧者時高其義祀鄉賢

陳治明海康人博覽子史長於詩嘗拾遺金候其主
還之問姓名不告而去時有謗縣令者令索之治明

曰止謗莫如自修必求其人則鑒令然之謗其門曰
齒德褒崇御史察善士邑人舉治明以應屢飲於鄉
林槩海康人少喜讀書手抄至百餘卷年三十八膺
歲薦繼母官氏頗酷槩善事之性慕義好施弟姪穎
秀者教之築館江濱就學者日益進赴試乏資者不
惜質田以贈之郡丞潘某於廷試時識面曾共論大
學衍義竒之訝其久不仕為勸駕槩曰今之學職不
過守苜蓿盤竊縣官廩食何曾講經問難我居家塾

教誨子弟不較愈哉竟終老于家人指其居葬之所
咸曰林師宅墓云

吳守經徐聞人少孤事母辛氏至孝攻苦自立應明
經選以母老不仕性好施族子自強以父貧鬻身遠
賈賈將挾以還守經聞其事急償其直而歸之仍割
產給焉族女貧過期不字守經具奩遣之鄉里稱其
義

吳兆亨海康人三歲喪父母陳氏矢志鞠之補郡庠

生母病篤兆亨焚香告天願以身代母病遂愈人以
為孝感所致督學羅萬程表茂英皆獎其孝行

右雷州府

林茂森字良才臨高人少孤博學甘貧事母至孝領
永樂丁卯鄉薦任武宣教諭勤於課士擇弟子之賢
者勉其成業嘗較註方輿儒林一覽行世

陶英其先巴縣人為留守後衛中所百戶正統九年
英調昌化所有姊老病癰且無夫家遂與同來凡越

山登舟皆英親負之姊心不安一日舟浮大江姊潛投水英亦投水救幾溺死舟人急拯得兩活竟負至任奉養如母

林孜字志善文昌人景泰庚午鄉薦母雲氏病疽穢莫能近孜朝夕泣侍撫摩除滌未嘗離側或謂疽有膿宜吮出孜一一吮之母果愈孜因毒入腹未幾亦病疽及劇自知不起嘆曰死生命也所恨母老不得終養而反貽母憂爾顧謂諸弟曰善事老母吾死無

以為念嚮妻子亦如之言不及私遂卒聞者悲焉

李宣字德輝澄邁人為兒時聞其父云祖子惠補遼海衛軍伍南北萬餘里父子不相見者二十年宣遂悲號不已景泰癸酉年二十四中鄉試上京哀請當道得往遼海時其祖年已八十矣相見慟哭見者無不墮淚御史戴縉憐之得循例就近補伍除遼海戎籍遂迎其祖歸鄉人嗟嘆

榮瑄瓊山人三歲喪父鞠於母氏與兄琇二人孝友

甚篤天順四年賊據瓊城殺不附己者以威衆城中人多棄老幼亡命瑄琇獨共扶老母問走賊既逼諒不俱全琇謂瑄曰事急矣並死無益我以死扶母汝急去庶幾幸脫一人養母瑄去琇與母為賊所獲欲脅以行不從賊大怒置母其前以刀按母頸謂琇曰我先殺汝母次及汝琇叩頭曰乞貫母願得相從遂陷賊中及大軍至琇自賊中走出為軍所獲執送主將以從賊將刑瑄冒死前進叩首流血被面請曰兄

以母故誤陷於賊令母老家貧恃兄為命瑄孱弱不能為有無願殺瑄存兄養母情辭哀迫主將倉卒斬之既而悔曰凡為人兄弟皆當知有此義吾枉殺好人矣遠近聞者莫不灑淚嘆惜

雲是文昌人元行省叅知政事從龍七世孫少多病父母憐之不令學然有美質所行常過於厚成化十五年喪母邢氏哀毀憂思飲食頓減漸以骨立三年如初喪無何復喪父連年哀毀竟廢飲食以死

鄭籍字孝夫瓊山人成化癸卯舉人任洛容知縣與
兄穉早失怙恃孤苦相依及長不忍分爨凡出入之
需皆兄主之一錢寸帛不入私室兄歿奉嫂益恭鞠
其女擇士人歸之鄉人名其居曰荆茂

王正海南衛指揮成化乙巳春偕指揮徐鼎自京師
歸舟次廣州波羅廟前遇暴風舟皆覆正推蓬出抱
舵避浪危在倏忽嘆曰吾友老母在堂吾與萬里同
行今日見其死可獨生耶頃電掣見傍有艇遂攀緣

登岸求斧劈船閱數艙始出鼎因而活者四十餘人
餘屍亦為厝置

唐繼祖瓊山人舟之孫任長沙衛經歷家素貧與長
兄承祖弟紹祖顯祖四人相愛成化間紹祖充解官
料虧價逮追繼祖賣其妻從嫁田數百金為償之妻
馮氏亦無難色鄉里以為賢

曾士元字仲仁萬州人瑁之曾孫也篤於孝友父魯
病瘡犯豕肉而卒遂終身不食豕見即悲泣母李氏

疾躬侍湯藥不遑寢處執喪哭踊絕復甦杖而後起
過祖塋雖夜必拜服及緦麻悉遵古制撫兄子若己
子復割田以益之以歲薦為福清訓導

羊修儋州貢生孝友慈惠厯知新城雩都兩縣民咸
愛之以母老歸養百姓懇留不獲為之立祠厯任俸
餘施予宗黨祀鄉賢

汪有執字義甫瓊山人事繼母孝鄉閭並稱領正德
鄉薦知海門厯官戶部員外郎悉稱職

張騰鸞崖州庠生海寇擄其父騰鸞率鄉勇奪之手
殺數賊被傷而死州以殉孝旌之

吳效字復初瓊山人少遊邑庠當食餽遭內艱不忍
就其少子死於車輓車子惶懼請罪曰汝何心誤傷
耳里中多好訟廢學乃攜精舍行朱呂鄉約演四禮
以勸說之祀鄉賢子會期另有傳

蕭成字子紹崖州人少喪母有弟尚幼繼母陳氏復
生第二人獨私愛之成自少至冠友愛惟均陳氏為

感化領嘉靖鄉薦任甄寧教諭丁艱歸以父遺田產
悉與次弟又出俸貲構舍與繼母二弟居焉次弟應
試溺於海撫恤遺孤經理婚嫁無異己子隣人死不
能殮亦為具棺葬之李茂作亂人多棄城走成晝夜
同州官巡城鄉里壯之

王天麟字文瑞瓊山人隆慶庚午舉人知贛縣入覲
途遇李氏女嚮於陳號啼欲赴水麟慨然捐五十金
贖還其母丁外艱卒於家

張可載瓊山人郡庠生員隆慶五年倭犯海口可載偕父逃賊及之傷其父可載奮力持刀殺一賊乃退負父藏山中求救於官軍竟無應者父死載痛恨鳴冤官軍懼賄之以百金卒不受事聞督學巡按皆移檄旌之

王盤瓊山人郡庠生員性篤孝隆慶六年賊擄其母盤多方丐贖以贖僅得免繼至者責如前無以應願以死生母賊怒俱殺之

王子聘澄邁人家貧力學父以愛妾故疎其母母病
毒瘡子聘陰求醫治時讀書館舍每父饋餐殮存其
半以餉母遇親朋酒食輒不忍御必懷歸遺母其父
底豫愛母如初母病篤為嘗糞甘苦其後兩任廣文
以二親不逮居常感泣俸貲盡以均其兄弟季弟雖
妾所出亦化之相友愛云

吳涵瓊山人郡庠生員行已端方取予不苟有同廂
陳可英借彭某銀七十兩貧乏不能償彭訟之官英

窘將自經涵知之盡數代償有友陳閭遠適密寄銀百兩舉家不知後閭暴卒涵持銀還函封未啓

潘之楫號寰瀛瓊山人生甫晬母陳孀居撫之楫長出就傅母每留餘食啖之之楫見突無烟知母未食忍飡半以奉母母燈下紡織之楫就餘光而讀才名甚著登萬厯甲午賢書戊戌上公車向母泣曰楫以母苦節未揚親恩未報故為此萬里之行不則安忍離膝下乎是歲副會榜厯任善化縣著賢聲赴闕陳

情賜建坊以表母節

陳宗昱瓊山人諸伯仲賈而遊者率倚辦資斧宗人無凍餓者或以不能葬不能娶告即周給之嘗代從子償逋初不令知蓋富而好行其德者家有海艘取魚網得番貨悉令輸之官人服其識

曾廷策字伯射儋州人卅角遊泮肆力於學敬事二親與諸弟終身同爨後與弟皆膺歲薦持家清介不喜殖生唯以訓子為務子開弱冠魁省人謂少耐其

志云

馮嘉遇號載賡瓊山人博聞稽古以三禮領天啓甲子鄉薦天性至孝篤志承歡當途交章推薦不忍違養應之生平睦族信友輕貨好義年七十有五梓里尊為文獻

右瓊州府

陳應隆羅定人由屯種把總授禮部冠帶儒士征羅旁獻策畫圖統義兵力戰有功及事平闢道撫民之

功居最萬厯二十四年歲荒出穀三百石入官賑濟
兩院旌曰尚義之家

李若絲西寧人早孤奉母至孝及母喪號泣三年值
母忌日必哀慟不食助工築城為邑里倡人皆義之

右羅定州

李郁字文盛連州人永樂中鄉薦為福清訓導知祥
符縣又擢開封同知及歸以俸餘置田均之兄弟其
後二百餘年子孫蕃衍皆郁之遺澤也

陳全學字兼甫連州人父竒才以明經任儋州教諭
全學補郡庠為人純孝母曾年七十老病臥床全學
朝夕侍崇禎戊寅流賊犯州全學謹侍母側賊至跪
告願以身代賊憐之且戒他賊不得傷孝子卒保無
恙郡守王立上其事兩院旌之

右連州

文苑

王佐字彥舉家世河東人元末占籍於南海時孫賁

與佐結詩社于南園開抗風軒以延一時名士佐才
思雄渾體裁甚工蕢深重之構辭敏捷王不如孫用
意沉著孫不如王何真禮聘二人皆使掌書記軍旅
事多見咨詢時李質以德慶豪帥據有肇慶佐與蕢
往說之遂通好質尤好文衣冠之士多往依之其最
知名者則有江右伯顏子中茶陵劉三吾建安張智
歸言於真使招致之由此真號稱得士洪武六年用
部使者薦拜給事中論思補闕恒稱帝意學士宋濂

嘗拜賜黃馬帝為歌命諸詞臣和之佐斯須而就有
臣騎黃馬當赤心之句帝覽而喜以為名世之作賜
鈔一錠佐性不樂樞要居官二載即乞骸骨帝憐其
誠許之陛辭日賜鈔五十千時臣僚自陳者多被譴
斥佐以恭慎得歸佐天性孝弟父沒時有廖元正者
為料理喪事殯諸南雄之九里山終身事元正如父
所為詩清逸評者比之高適岑參

孫黃字仲衍南海人

今順德

性警敏於書無不窺為文

援筆立就雄深雅健有魏晉風元季東莞何真保有
南海黃往從之廖永忠南征黃為真作書歸附曲盡
誠款永忠遂辟黃典郡教洪武三年庚戌詔天下設
科取士黃舉于鄉授工部織染使調虹縣主簿安集
勞來民還其業甫一載入為翰林典籍學士宋濂樂
韶鳳承旨詹同甚重之奏對便給容觀飄灑瀛輩自
以為莫及也八年同修洪武正韻九年以奉常之節
監祀西川既三載力求外補為平原簿無何逮繫輸

左校築牆望都門謳吟為粵聲督者以聞召至陳詩
皆忠愛語釋之十一年罷歸田里十五年召拜蘇州
府經歷二十二年謫戍遼東都帥梅思祖節鎮三韓
素重黃迎居家塾未幾坐黨禍

李德字仲修番禺人夙負逸才博極羣書洪武初以
明尚書薦至京歷仕郡邑十餘年年且暮改就教職
歸老於家有易菴集

黃哲字庸之番禺人世為著姓弱冠而孤刻苦讀書

通五經文選詩造晉唐奧域性好山水結廬蒲澗棲
息其中往來羅浮峽山南華諸名勝以為未足乃辭
家度庾嶺過吳楚遊燕齊間一時湖海英豪皆與納
交當風雪時泊舟秦淮遇朱文昭涂穎輩握手吟咏
沽酒大喙二人喈曰君才如白雪吾雖知音如寡和
何自是名籍甚值明太祖駐師金陵招徠名儒丞相
李善長叅政張昶汪廣洋交薦之拜翰林待制入禁
閣侍太子讀書太子愛重之鈔幣之賜無虛日歲旱

御製喜雨詩命哲賡之甚見褒重洪武初奉使青徐
諭諸反側尋出知東阿縣剖決如流案牘無滯值旱
麥苗盡凋乃齋戒徒跣烈日中甘澍應祈民懼呼曰
此黃公雨也浪溪有怪物作祟竊人啗之哲為文禱
于神須臾風雷大作一青蛟斃水上人稱其誠感時
經毛貴亂後民多流徙他鄉聞哲善政復業者亡慮
數千人戶口日滋四年遷東平府通判東阿士民涕
泣攀留是歲黃河決梁山中書省發民疏浚哲董東

平之役經畫有方民不告勞有司欲復堰黃陵岡哲
建議止之尋上疏陳時務數十事帝怒其狂會山東
分省奏哲捐俸修先聖祠築積水湖隄有成績乃釋
不問哲亦乞歸得允既南還有司請哲領郡校事橫
經授徒四方至者多名士八年復徵還判東平後以
事註誤竟寘於法哲始北上時倚篷聽雪常自詫曰
天下奇音妙韻出自然者莫是過也歸構一軒名聽
雪篷學者遂稱為雪篷先生

趙介字伯正番禺人博通六籍氣宇豪邁興至即揮毫賦詩人莫測其涯涘父景元與母連喪介孤貧閉戶讀書無復仕進意植二松于所居扁其軒曰臨清以淵明自擬南海文士李韓以薦起介力止之不可臨別介泣謂曰堯天雖長劉日實短子獨何心韓竟去後倅南康被累乃歎曰趙伯正真高士也介行常以囊自隨遇景即投詩其中絕不為人留題獨與劉樂善輩相倡和日往還西樵泉石間有司屢薦不起

洪武己巳以累逮赴京卒于南昌介顏如渥丹丰度
類神仙中人子潔絢繹純埭善詩文工隸篆絢隱居
有父風後純貴贈介為監察御史有臨清集行于世
黃勣字敏功東莞人博學為文雄放出入經史追蹤
古人元李避地白濠寒暑不倦雖在離亂中持志益
堅洪武初以薦授邑訓導善教著聞後改梧州致仕
卒于家子益受世其文學雅志不喜仕永樂庚子有
司強之入試中選竟隱居不出子結最知名另有傳

歐觀生香山人個儻不羈博學工文詩尤豪邁洪武
丙子鄉貢進士教授紹興以性介忤當道左遷什加
典史歸年六十卒所著有梅軒集

鄭毅字德弘南海人洪武庚戌舉于鄉釋褐監察御
史嘗按八閩以清直稱才思敏贍所為詩揮毫立就
一時言能詩者必曰鄭御史

馬名廣番禺人少通經能賦詩以家累戍遼左在戍
所未嘗廢書與新會黎正倡和詞多悲壯人傳誦之

洪武癸酉詣闕陳五事帝察其言多可採用但謂工商子弟不宜與士列非聖人有教無類之意命禮部擇行之尋授泰和丞

鄧林字士齊新會人洪武丙子鄉薦授貴縣教諭林素嗜學工古文辭嘗謂學詩於陶韋李杜學文於史漢韓柳學書於晉唐諸名家云考績至京大學士楊士奇祭酒李時勉見其詩文以為嶺南人文在是留史館修書尋出教南昌被薦遷吏部主事宣德四年

以事謫杭州名士多從之久之放歸田里卒生平慷慨自命尤篤友誼所著有退菴集傳于世

梁臨字仲敬新會人羅蒙正弟子英華秀發工詩文而長於舉業蒙正稱之洪武庚戌薦於鄉辛亥登進士賜燕中書堂賦詩有鼓腹愧蒙天澤溥願推餘滴遍蒸民之句一時翕然稱之官至禮部主事

何子海字百川番禺人宋進士起龍之後博學能詩嘗擬秋風三疊清婉沉蔚見者服之登洪武辛亥進

士厯睢寧永康丞

黃裳字文中東莞人先世家莆田從父景和來戍南海性莊重刻志學問通百家子史工詩文善書翰戎衛禮為社學師文武子弟從游者以百數有敬菴集董匡字宗輔番禺人性介特邃於易尤善草書隸篆與弟廙俱負才名稱番禺二董永樂丁酉領鄉薦明年赴春官兄弟同登乙榜匡授萬載教授癸卯典山東文衡秩滿超為貴州道監察御史獻獄平恕廙授

金谿訓導有二董集傳世

黎暹字景升順德人穎博工文辭精楷法成化乙酉
薦於鄉卒業胄監為祭酒邱濬所稱授金華府同知
當塗有作多出暹手以礪易舊碑為狹中者所憾罷
歸構羅江書院吟嘯其中頌賦誄銘踵門祈者無虛
日文筆遂冠一時垂老自志其墓所著有草庭集

涂瑞字邦祥番禺人少穎悟蔚有文名成化丁酉領
解首丁未進士第三人及第授編修肆力於學醞籍

日遂同館皆推重之庚戌以修憲宗實錄成遷修撰
癸丑引例歸省旋卒於家瑞所為文汪洋浩滴成一
家言時東莞劉存業亦以第二人及第並有文名

梁有譽字公實順德人父世驃御史有譽秀穎日誦
數千言長益湛思百氏以嘉靖庚戌進士授刑部主
事是時諸郎李攀龍徐中行王世貞宗臣舍人吳國
倫山人謝榛結社為聲詩有譽在社中稱七才子嚴
嵩柄國其子世蕃欲親有譽有譽恥為褻狎遂謝病

歸卒年三十六著有比部集弟有正綿州守亦能詩
羅虞臣字熙載順德人幼穎悟一覽不忘九歲能屬
文弱冠舉嘉靖己丑進士補建昌推官建昌號繁劇
難治虞臣素習爰書嫻於吏事又以文章潤飾之故
虞臣居官文日益進而治日益有聲各推官皆自遜
以為不及三載徵拜刑部主事改吏部與李開先任
瀚輩以文章氣節相高而虞臣尤剛腸疾惡面斥人
短以故多忌之者開先曰熙載且見中於法矣會宛

平人劉東山上變告張延齡姦連虞臣於是逮詣詔
獄虞臣從獄中上書詞甚激昂通政鄭紳覽書棄去
不奏獄成下御史府王廷相憐之當虞臣縱重囚黨
元惡杖五十褫職為民虞臣既歸就中山結草堂總
括百家欲以文章自立兩廣都御史蔡經方薦於朝
未用卒年三十五所著有原子八卷行於世葉春及
盛稱之

黎民表字惟敬從化人貫之子自少穎異九歲習舉

子業十三補邑庠生二十領鄉薦屢上春官不第慨
然有隱羅浮之志以母促之仕始就銓初授翰林孔
目歷司務主事郎中內閣掌制敕侍經筵預修玉牒
及世宗穆宗實錄進河南布政使叅議仍掌制敕事
萬厯己卯春乞致仕歸賦性坦平無城府雅好讀古
書過目輒成誦上自墳典下迄百家稗史罔不涉獵
嘗師事香山黃佐佐雅重之居清泉山中日與弟民
衆民懷友人吳旦梁有譽歐大任唱和其間明自孫

賁王哲諸人以來詩學大振海內名流如文徵明王世貞兄弟李攀龍徐中行宗臣吳國倫皆互相應和居恒澹薄自甘家苦貧素惟富於文墨工四體書亦能圖繪嘗修葺廣東從化羅浮諸志所著有瑤石山人稿

歐大任字正伯順德人博涉史籍與黎民表梁牧梁柱臣相友善俱以詩名以明經授江都訓導應虞衡郎中當大任北遊時厯下瑯琊諸大夫主盟壇坫大

任周旋槃敦間海內無不知有大任者後以老乞休
卒年八十有虞部集行世

李時行字

闕二
字

番禺人負才名登嘉靖辛丑進士由

嘉興令擢車駕主事以明敏稱忤上官罷去年甫三
十一歸築小雲林吟詠其中所著有駕部集雲巢子
天求子諸書

陳建字廷聲東莞人知府恩季子也與兄越超赴皆
領鄉薦而建為春秋魁究心因革治亂之迹及道術

邪正之機兩上春官皆乙榜以母老選授侯官教諭
日勤陶鑄分俸周士之貧者與巡按白賁論李西涯
樂府因著擬古樂府通考與督學潘璜論朱陸同異
作朱陸編年考督學江以達命校十三經註疏成代
作上十三經註疏奏稿遷臨江府學教授編周子全
書程子遺書學部通辨大有造于來學江右廣右雲
南湖廣四聘棘闈所得多名士而滇士嚴清後為名
家宰時論多之尋陞山東信陽令興利除害民稱頌

馬未幾以母老歸養並銳意於著述哀輯明朝通紀至今為海內所宗學者稱清澗先生

劉克正字懋一從化人生而穎悟隆慶丁卯舉於鄉辛未會試主司竒其文擬魁天下後置第六時論惜之既第進士改庶吉士尋授檢討奉命冊封靖江王饋遺一無所受修兩朝實錄成賜白金文綺會奔父喪南歸哀毀踰節起復抵維揚卒於道年僅三十七克正質敏才茂肆力詞賦為丁士美諸大綬輩所雅

重當作越蒙白雉賦璀璨華麗世競傳之

祁衍曾字羨仲東莞人順之曾孫性通脫豪軼不羈
年二十三始折節讀書補邑諸生縱遊朱明入閩自
戴湖之白鹿乞食於西昌困而歸舉萬厯丙子鄉薦
與計偕名傾都下既屢蹶春官而好遊益甚所至詩
墨淋漓最善葉春及嘗於羅浮構遲葉菴以待之久
之以母喪痛哭發病卒所著有綠水園集

尹守衡字用平東莞人年十六補諸生督府行縣衆

皆跪迎守衡獨長揖令譙讓之守衡曰此祖制也君子豈媚人以非禮之恭哉令異之萬厯壬午舉於鄉署清溪教諭分校楚閩擢知新昌縣不善逢迎左遷趙府審理正歸而杜門著書採洪武以來政治人物勒成一百五卷名曰史竊論者以為陳建之後一人而已詩文有嬾菴集年八十三卒長子魁昌崇禎丙子鄉薦次兆昌能佐父考覈季玉如刻書以傳

林承芳字文峰三水人鍾之孫也幼穎悟墳典無不

究覽工詩文精翰墨中萬厯丙戌會榜廷試奏策纒
纒萬言皆經濟實學已定第一人以字小訛置二甲
第一授編修受知神宗命書中極殿額甚嘉賞之為
爭名者所忌左遷江西叅議歸怡情山水遇景輒吟
詠所著有文峰集竹窗存稿人有得其翰墨者如獲
重寶承芳黎民表之甥人謂酷似云

陳襄字尚行東莞人龍之孫九歲能文以書經領萬
厯辛卯鄉薦為人質樸謙和不苟取與篤志好學游

楊起元之門甚器重之年四十四卒子其大生邁順
治辛卯副榜製天象儀器訂正古今律呂推演三才
為八十有一條編曰成經世咸重之

鄭露字湛若南海人生而甘露降庭因名露幼聰慧
絕倫年十三補博士弟子員為人尚氣節工古文詞
愛讀左氏莊騷史記詩法漢魏盛唐書工篆隸行草
徧遊燕齊吳楚所至為之傾蓋開府張鏡心築館崧
臺下榻禮之所著有嶠雅集

右廣州府

李孜字日孜保昌人博學多聞正統辛酉舉於鄉歷南靖寧遠豐城三邑教諭遷淮安教授三聘文闈所至得人布政使陳選稱為真五經師少保邱濬欲薦以館職會孜引年不果孜性狷介負氣不輕與人交為文典贍有法尤喜蒐葺郡中故實雖位止儒官而譽望特重所著有林塘集

右南雄府

吳高字志高歸善人宣德八年進士歷官刑部主事
員外至福建叅政好學能文既致仕幅巾杖屨徜徉
山水嘗修郡志文譽重一時

楊天祥字休徵本博羅人父順遷於歸善生天祥讀
書白鶴峰晝不踰閤夜不沾席其讀書之法以心對
書以耳聽聲不求上口亦不强解當其讀書甚專壹
一切不聞見為文操筆十言悉有根據正德丁卯鄉
薦至甲戌下第省父于膠州誦書官廨琅琅徹衢道

膠人傳之予卯成進士遺友人書曰古人讀書破萬
卷予自弱冠厲志讀書至今十三年一年之中除令
節家慶及疾病之日不過六十日其三百日皆誦讀
日不下三簡一年不下九百簡十有五年不下一萬
五千簡方之古人萬卷僅十之一二然以近世較之
予猶為多而場屋之中所取甚約何者七篇之文如
其泰度而止五策之文如其條貫而止論雖可肆亦
有步驟不得大騁至大廷之對檢點敬慎且晷刻有

限難以展盡譬之珍羞錯陳屬饜則止巨木輪囷就
墨則削其餘酬應不能踰於人情物理擬古則迂反
古則倍讀書雖多豈盡可用哉古人云精兵三千足
敵羸卒百萬蓋以此也昔尚子平救斷家事徧遊五
岳豈圖喻人哉亦求自喻而已然遊五岳則有跋涉
之苦離曠之憂踰年閱歲僅乃徧之五經備天地萬
物之理此五岳也予史百家亦洞天福地也予徧厯
之豈直臥遊雖不足喻人亦足以自喻矣時人見其

書以為名言

錢萬選字紹行歸善人年十二通春秋弱冠補諸生
屢試輒冠其曹郡守黃某延為子師嚴色笑善誘迪
言行端方不欺閭室萬厯癸巳選貢南雍與楊起元
講學西湖為士子所宗祀鄉校

右惠州府

林仕猷揭陽人洪武間由儒士授邑學諭轉本府教
授博學能詩名聞都下學士宋濂嘗言潮去京師六

千五百里而遙然余知有林仕猷也

蘇福潮陽人有夙慧再歲而孤五歲始能言自是矢口成章北山驛丞遇福拾穗隴上戲曰拾穗與神童即應聲曰折梅逢驛使其警敏多此類洪武間舉童子科赴京以年小令還里有司月給廩所著秋風辭紈扇行時多稱之其咏朔月詩云氣朔盈盈又一初嫦娥底事半分無却於無處分明有渾似先天太極圖王世貞謂湛若水恐不能到卒年十四祀之邑校

林大欽字敬夫海陽人生有異徵翁萬達見其文許以國器弱冠應鄉試對李綱十事御史吳麟即以大魁期焉嘉靖壬辰廷對文益奇都御史汪鉉訝其起語違制大學士張孚敬曰是嫺於辭必當帝意遂品置第三進呈帝親擢第一授修撰尋乞歸養未幾卒大欽夙以才自負雅慕蘇氏學為文酷似之

蕭端蒙字日啓潮陽人編修與成子少善屬文嘉靖辛丑登進士選庶吉士著論二十餘萬言出為御史

按貴州請增試額是年監試得解首孫應鰲再按江西監試又得解首李貴程錄皆出其手海內傳誦之陳時政十餘疏文氣古雅有同野集時林大春亦工古作有井丹集

右潮州府

梁敏字以訥高要人父至孫有善行仕元為新州同知敏性孝友穎悟能文年十九舉洪武壬子鄉科為清遠教諭厯繁昌宛平縣丞以文學薦特擢左春坊

左贊善眷遇日隆常被命作午門觀燈詩及賦朝陽
鳴鳳圖操筆立就成祖稱賞不已尋以乞休忤旨謫
遼陽苑牧再自陳復謫枝江訓導疏屢上得復官致
仕中年喪偶不娶自奉如寒儒以勤儉訓諸子多所
著作年九十有六卒有雲萍集

鍾瑛字汝器高要人修眉豐頰沉默簡重事親孝年
十一遊郡庠子史百家靡不該洽永樂辛卯登進士
選文行優者入秘閣習譯館文字瑛與馬初為庶吉

士無何授編修肆力編摩詞林稱重賜馳驛歸省鄉
人榮之秩滿轉大理寺正仍入秘閣纂修雖久居侍
從不殊韋布丁內艱歸哀毀成疾而卒

陳衡字祖平陽江人舉永樂丁酉鄉試補上舍生授
戶部山東司主事調工部以汰冗官記名于家未幾
檄取復任督徐州百步洪以廉謹著聲政暇喜吟詠
嘗作潭底月詩百餘首以見志人多稱之

區大相字用孺高明人為文有奇氣援筆數千言萬

歷癸酉舉於鄉己丑成進士選庶吉士授檢討同修國史經筵展書歷贊善中允掌制誥居詞垣十五年先後柄政者皆賞其文輒引避一無所與自給諫調南太僕寺丞二年移疾歸里居八年卒明季前後七子稱詩號翰林為館閣體大相始力祛浮靡還之風雅再使封藩歷齊晉吳越嵩洛衡湘咸著篇咏天性至孝公論侃侃義形于色其文行皆足重云所著詩文集傳于世

區懷瑞字啓圖大相之子弱冠賦秋鴈詩宰相趙志
臯一見器重之天啓丁卯鄉薦授當陽令值流寇殘
破力行撫字直指使者薦之未幾以內艱去後補平
山令告歸田里所著有趨庭稿遊燕草遊滁草

麥而元字元人高明人崇禎庚午辛未聯舉進士授
上海令城外有虎傷人為文祭之而虎去以註誤謫
檢校補安肅縣嗜學工書法長于詩賦所著有康山
集

右肇慶府

梁調元欽州人年十二補弟子員治春秋督學表茂
英優禮之閱四科不第州守張應宿一見驚嘆曰滄
海遺珠也延為上客凡著作皆其屬稿年三十二卒

右廉州府

吳宗直遂溪人性敏慧通羣書工筆札建文己卯中
南京鄉試官至禮部郎中藻思煥發朝中重之歿祀
鄉賢

陳素蘊字鳴盛徐聞人少有才名工書好吟咏徐聞自成化戊子後無登第者素蘊領嘉靖乙卯鄉薦一榜推升冕任詔安縣令有惠政卒於官

柯時復海康人領萬厯乙酉鄉試性嗜古尤喜詞賦效杜甫作七歌意調悲壯居父喪哀毀盡禮俄得疾卒子鳳翔孫元芳皆有文名

右雷州府

鄭儒字子珍瓊山人廷鵠之子少守庭訓淹貫經史

挾筴宦遊京師作為詩文有出塵之趣司訓容庠轉
上海厯連州廣州却贄幣勤於課士嘗著竊位箴以
自警彙井銘以訓士題留餘軒以見志云

右瓊州府

隱逸

黎正宇彥晦新會人少時從孫黃遊博通經史好揚
推古今洪武初補郡庠生舉為邑訓導不就退築釣
臺曰此吾嚴陵瀨也八年辟明經至京以病不赴部

試遂賦詩出都門後以事戍遼東十八年備嘗艱阻
而意氣益增比放還杜門不出學者多從之游初正
在遼時孫賁亦戍遼抵法正解衣裹其屍葬之安山
為文哀之讀者墮淚自遼歸適薄暮亟呼酒登釣臺
嘆曰風景無恙老子亦復歸來吟嘯久之乃抵家卒
年五十九所著有林坡集元史斷諸書

張撝字彥謙新會人羅蒙正弟子也嗜學強記年十
八賦厓門詩蒙正器之長益潛心經籍洪武初知縣

謝景暘為構堂于象山之麓俾邑人師事焉扁其軒
曰養拙學者稱為象山先生

陳英字廷佐原籍四明扈宋入粵祖德甫元廣州路
提領始籍南海傳子季澤明洪武初舉人材赴闕授
叅議英其曾孫也博記能文尤工詩賦甫遊郡庠隱
居樂志授徒講學多士景從嘗建秋澗草堂于歸德
門左澗當四山諸水之間常踞石倚樹囂囂踞踞四
顧超然放歌獨樂郡人稱之為秋澗先生香山黃佐

為英高弟其父畿建粵洲草堂英與為道義交時稱
穗城二隱子則官御史立朝忠正別有傳

黎和字伯英南海人少警悟能文美風儀事親以孝
謹聞與孫蕢唐豫友善元季避地槎溪歲凶力耕供
養猶手不釋卷親沒廬墓三年既而還夏溪闢萊蕪
耕鑿自適當揭八行為家訓鄉人化之永樂庚寅辟
茂才至京以老疾乞歸時東莞表友信亦兩被徵書
皆矜修之士也

鄧信字行甫新會人自稱水石山人精詩畫及岐黃
性孝友溫粹削迹公庭徜徉山水適然自得蕭博士
端升慕之及遷瓊教授諷索別章強而後與詩云散
袖秋風老一株美人南去有詩無六年相問不相見
夢隔城西曉月孤嘗過陶博士題其壁云陶潛今亦
聖之清五柳柴扉近市城秋思滿天人欲醉碧雲屏
裏一簫聲其風致率如此

林泉立順德人自少敏悟博涉經史皆通大義明初

隱居不仕教授生徒與黃真學闕河叟吳竹齋游有
詩行世

李孔修字子長順德人自稱抱真子僑居省城高第
街混跡闖閭人不識也張翊薦于陳獻章獻章稱之
名由此著一日孔修輸糧于縣縣令異其容止問姓
名不答拱手而已令怒其無禮笞之會庶母誣其奪
產令廷鞫之孔修請筆置對第曰母言良是令疑焉
廉之則孔修庶母已改適所言盡誣乃禮敬之貧居

蔬食不繼未嘗一顰眉詩字間出新意或觀山水歸而圖之畫猫絕工公卿以箋素求之輒不可得嘗負樵薪錢畫一猫與之樵者怏怏中途人爭購之已而樵者復以薪求畫笑不應阜帽深衣不同俗製經旬一出戶必遠近圍視吳廷舉由縣令厯藩臬在粵最久與孔修為布衣交既沒無子副使李中少叅王宗教經紀其喪尚書霍韜葬之西樵山志其墓謂白沙振世之志唯孔修張誦謝佑不失其宗云

謝佑字天錫南海人嘗從陳獻章遊一聞主靜肯綮
遂築室葵山之下棲焉并日而飧襪不掩脰晏如也
病中題詩寄友人湛若水遂卒後若水祠其師于白
雲山以佑配

何廷矩字時振番禺人為郡諸生以文行著見陳獻
章後即棄舉子業從之遂不復應舉所著有禮意大
全三卷存羊錄十卷皆本周禮云

鄭鴻字振儀香山人年十五有聲庠序成化甲午舉

於鄉屢厄會試梁儲為少宰鴻肺附戚也客或諷之
鴻正色曰子徒知少宰能貴人獨不知人有良貴耶
遂絕意仕進卜築蓮峰下鑿池構亭徜徉自樂祀鄉
賢

張纓字廷弁弟綱字廷文順德人兄弟並出湛若水
之門孝友敦樸執親之喪一循禮節纓旣終喪遂怙
退縣令宋邦俊督學魏校張希舉先後表揚之綱好
行義輸粟助賑為族里倡邑請鄉飲不就終身欽欽

翼翼時謂二難

陳鶴世襲南海衛百戶生而穎悟絕羣年十餘已知
好古書名畫窮晝夜誦覽十七齋祖爵不自意鬱鬱
得竒疾則自學為醫久之洞其旨七年而病愈遂辭
官遠遊自號海樵山人踰粵嶺下彭蠡游吳渡越徧
交海內知名士歌嘯吟詠一坐盡傾其學無所不通
酣嬉淋漓變怪百出所作詩歌書畫時縱逸有竒致
倦遊而歸士常輻輳其門酬接無倦已而復遊金陵

造顧尚書璘先一夕璘夢李白至及見乃山人也遂
深相結客留四年竟不復返璘嘗稱其意氣雄邁凌
跨諸貴遊似東方朔五官並用才思敏捷似劉穆之
至於獲雜俳優忽而整襟談道抗論世務又大類曹
子建蓋天才宏放依隱玩世之士也

林彥愈東莞人少服賈困於魚鹽已乃手書范仲淹
畫麀粥長白山時事示其子光光所欲讀之書必購
而貽之久之光舉於鄉從陳獻章講學則愈喜呼光

謂曰汝學能有立吾啜菽飲水甘之不求紆青拖紫也

黎釭字以和增城人為人敦樸恬淡能文章而不樂仕進嘗隨父皓宦西粵清苦自勵父深喜之遣謁湛若水聞講心性之學至數日徘徊不能去若水謂其可進於道云性好施予里中骨有暴者殮弗給者不憚罄家橐以襄之御史潘珙為之志其墓

單雍增城人隱居羅浮從湛若水遨遊於巖竇間常

代輸族人逋糧殊無吝色旅中拾遺金追而還之鄉人上其誼於督府蠲其差役

陳觀字思賢南海人四歲而孤稍長讀諸子百家書強記數千言從孔百平遊嘆其穎悟平居製古巾服誦古言行築亭江濱不求聞達四方髦士多就講學尤長於詩有幽雅之致時與同志進艇沙水間出瓦缶蔬食賦詩論學生平無疾言厲色誨子弟輒告以忠孝年八十六卒有集傳於世孫錫見人物傳

鍾景星字叔輝東莞人少習舉業聞湛若水講學西樵遂受學焉與陳謨郭肇乾相策勵終日正襟未嘗少懈久之充然有得飭躬砥行毅如也家最貧然毫不苟取雖往來諸名公間終身未嘗有所干人以此並重之晚年養愈冲粹喜怒不形未嘗疾言遽色見者知其為有道之士云卒年七十四邑令喬誥葬之何維栢銘其墓

金詔字廷言其先廬陵人從叔貴以水軍千戶調衛

廣城占籍鍾村少聰敏精楷法初業儒後以武胄補
幕府叅隨時總制大征田州及黎賊兩遣調兵于思
恩忠州督兵所過秋毫無犯制府竒之子節庚午舉
於鄉詔曰賴祖宗之庇幸有今日吾耄矣汝其勵志
以報後節登丁丑進士歷官南戶曹郎詔年七十八
矣欲一往觀金陵形勢跨大孤匡廬以泛都陽抵南
都鶴髮飄蕭都人士以為仙骨僉問長生訣詔曰修
短本造物得來然清心寡欲似亦有助借居倪氏花

園密書其別室曰謹言語防物議其自持若此後歸
隱深居一室有司延為鄉飲太賓年八十而卒

霍傑字民先任李弟也倜儻不凡脫然世外嘗遊羅
浮不食十數日無饑色屏去廝僕獨棲西樵錦巖中
採蕨和粟炊之聞湛若水講心性之學移書辨論久
之信服願執弟子禮方獻夫與論古今名賢無當意
者獻夫笑曰古之狂也居三載忽出省城別知己登
越秀山坐石而逝

陳暕字子覺增城人少倜儻自雄遊于陳獻章之門
亟稱之讀書于南海廟大書一聯於門御史按部見
而竒之以禮召見後訪獻章語及暕歎曰斯人異才
也當成其器獻章嘗與之詩有過客窺諸葛論詩病
長公之句蓋深與之也

黃學張字藝卿番禺人幼穎悟精毛詩偕李義壯倫
文叙王漸達擴拓古今商確理道三人雅重之已而
遞登顯要張獨閉門敦古年八十二卒朱尚書衡志

其墓謂庶幾髦期不倦云

黎民懷字惟仁從化人貫李子少受業於黃宮詹佐
佐深器之與兄民表民表有三鳳之稱督學蔡克廉
大奇焉嘉靖乙丑膺歲薦抵京與王世懋吳國倫張
鳴鳳倡和翕然稱之廷試後歸至豫章諸王孫聞其
才名爭求識面既歸絕意仕進日惟操觚染翰雅歌
壺觴為詩清曠閑逸不減王孟書畫出入晉宋時稱
三絕雅慕神仙所居室紫芝生焉趙志臯稱其蒼顏

古骨逸思高風比之陶元亮贈以詩有談元帥鮑葛
作賦擬機雲之句卒年八十一有清居集

洗桂奇字奕倩南海人領嘉靖辛卯鄉薦登乙未進
士授工部主事時夏言當國諸司震懾桂奇與語不
屈遂為所忌無何吏部郎缺霍韜擬補桂奇桂奇力
辭乃改南刑曹乞終養許之桂奇師事湛若水遂與
俱南訪匡廬遊白鹿登武夷厯覽諸勝歸而奉母居
羅浮革履布服無異野人世稱其清風勁節云

霍若邴字質亭南海人贈尚書霍華孫居家孝友博學好古善屬文累試不售歸隱石頭鄉怡情高尚杜門教子生平謙讓廉潔鄉人咸推長厚焉年七十卒子子偉登辛酉賢書厯官刑部員外

周郁字尚文號耿菴東莞人應禮記明經福建漳州府訓導講學不倦歸里與陳獻章唱和有龍洲草集行世子昌齡孫訥俱有詩名訥子一士字貴謬以禮經世其家兩中副車當事式廬不得一見厯吳越晉

楚間所交多名人善書法世稱為石林先生有五老園稿楚游諸草行世子顯少穎異屢試冠軍徵辟疊至隱居仙溪平生所著多不存稿翰林張家玉檢其餘者刻之楷草行隸與父並美云

陳世善字惟敬南海人別號海槐祖則正德間名臣按楚時嘗獲南嶽異方世善煉丸救人海內傳之事親甚孝嗜讀書燕居有威儀衣必布素恒喜施與歲饑米藥並施存活者衆郡邑屢聘鄉飲子誠字表端

性孝友精於經學與先哲鍾鼎臣交勵廉隅尚氣節
力學三十年一日語及門曰吾學靜以為體觀以為
用體用雖殊靜觀無二建靜觀亭學使者魏校獎其
方正年企百歲而終著有靜觀存稿以范經授壻黃
士貴登順治戊戌進士孫賓王領壬午鄉薦

屈起鵬字圖南番禺人家貧力學年三十餘始補邑
諸生未四十喪妻即不娶獨居五十餘年杜門著述
年八十五猶入鄉闈監臨御史憐之起鵬自稱矍鑠

可用既而歸隱沙亭設帳講學年九十八卒

張二果字穉復東莞人喜參究性命之學天啓丁卯
舉鄉薦見巨璫魏忠賢搏噬正人不求仕達師事黃
巖僧創建羅浮華首臺水簾洞山諸寺而棲托焉崇
禎丙子詔舉賢才不就戊辰修邑志後卒於江西廬
山以浮屠法葬所著皆佛書

潘梧字太操番禺人湛若水門人也直內方外鄉黨
化焉立祖廟於西村葬先世於西竺俗尚侈麗梧獨

築土令堅緻而已其後廣州被圍衝車礮石多取材
墓中而潘氏獨完人服其遠識年八十卒於萬厯中
舉祀鄉賢二子蘭珣早卒孫雲衢少穎異梧自教之
中崇禎庚午鄉試數上公車甲申後偕弟雲銜入羅
定山中數月卒子棣元學博辛武舉以學行世其家
新會負汲者不知何許人日擔水賣於城外得數錢
即負手行歌於道求火必于寺觀絕不干人縣中人
或呼之引至譙樓外仰視曰我平生未嘗入此翻水

而去一日道上拾遺金默坐其處人問之不答既而失金者至遽曰金在旁人教令考問其數數合即大笑還之失金者酬以金不受疾走視其擔具向壞挽住欲為易之負汲曰吾不舍吾舊並疾走終不顧

新會採藥者不知何許人日採九里明賣以為食其藥多生柑荔圃絕不犯柑荔雖自落者亦不顧人怪問之曰自食是盜也圃不容盜入是自絕也日得十錢以其半入酒肆醉即行歌歌詞多超脫一日道上

拾金釧珠珥置藥籃中歌曰實實實得好失好失好
得好人莫測其意頃之一女子哭而至笑曰失寶者
至矣寘籃于地令自取之主者饋以金搖手而歌曰
不受不受真不受還金籃香得金臭悠然而逝後歲
饑入山不知所終

右廣州府

鄧球顓次子樂昌人聰穎好學領成化甲午鄉薦嘗
遊陳獻章之門有詩贈之曰忠臣有子堪傳後古道

無人僅見君自稱東川居士吳廷舉建祠祀之

譚高字德崇以貢授上猶訓導陞華陽教諭遽乞歸
居家三十餘年杜門課子與松菊為侶

林儼翁源人號友琴居士性孝友生平恬約晦迹不
仕年八十三卒

黃器先翁源人幼岐嶷工對句年十一遊邑庠王守
仁來撫民見之授以傳習錄當任建寧訓導年餘告
歸隱居青龍玉華二山間安貧樂道絕跡不至公庭

所著兩京賦儒頤集弟德先並有文名

鄧思顏字于復樂昌人少遊黌序即毅然以名教為已任設義田篤孝友族有束脯弗給者輒與之萬厯中以德望與薦辟固辭不就

劉天然字中江仁化人明經不仕圖書四壁課子之餘不干外事所居號樂此園

廖樞字鑄于曲江人嗜書史好友樂善隱跡灌園督學魏校題其門曰耆儒逸叟

右韶州府

謝憲字汝慎歸善人不事藻飾癯然鶴立事父母定
省如禮不有私財為邑諸生與葉天祐劉梧同舍志
聖賢之學歲薦至京卒業太學歸築處士臺居之葛
巾木屐日攜離騷往來西湖浩歌至暮而返嘗於臺
畔折竹枝濡赤土註易葉春及受而錄之名周易竹
書其時河源李學顏亦以諸生應貢不仕居鄉多大
節嘗建議修復故城有保障功後以子燾貴封中大

夫

右惠州府

周伯玉名瑤潮陽人少貧讀書自娛累辟不起親知
或勸之仕伯玉曰讀聖賢書顧外慕干祿耶明初復
被徵辟辭曰吾老矣無能為也以處士終子三人彥
敬彥作彥器皆膺鄉薦彥器名礪與兄俱受經於其
母郭而彥器最知名洪武十六年會罷制科舉名儒
應詔第一授大理評事尋以廉能遷河南叅議卒於

官母郭詳具列女傳論者謂伯玉義至高而其妻亦能偕隱至於三子皆賢滋以難矣

右潮州府

黃環字伯循欽州人性淳厚甘淡薄洪武間舉於鄉任臨桂教諭陞韓府教授致仕家居有雲雁下前池與家鵝遊息韓王思環教習之功屢遣使迎不赴因奇其事賜雁來池扁建坊于古渡口遭范子儀變燼之

耿寬合浦人嘉靖癸卯舉人任江西大庾知縣端嚴
寬大不假刑威中年解綬浩然而歸人謂有五柳之
風

紀通字守塞靈山人居平南松栢山之麓生而穎異
精皇極經世之數事親盡孝由貢授陸川司訓閉齋
讀易每言奇中已而掛冠東歸修館舍教授弟子屢
舉大賓不就著有松溪集

柳稠靈山人號海峰好學善事異母兄領鄉薦任永

新縣丞清操自矢直指褒美之耽悅山水歸隱鄉園
終不出

孫佐性靈山人行至孝隱居不樂仕進萬厯十四年
巡按御史汪言臣給扁賜金帛獎之

右廉州府

梁羽翰號鵲起海康人少負才名力學不倦領天啓
辛酉鄉薦崇禎癸未成進士歸家杜門不干仕進時
同榜多在要津勸其出仕不應無何遂卒二子遇饑

荒亦相繼而亡郡人惜之

駱廷用海康人恬於聲利再讓貢與同門黃玠陳端吏部移文嚴核強出應弘治十四年貢甘淡泊不肯授官有隱逸田文詩傳于世

右雷州府

王惠字仲迪號霜筠本籍合肥人從兄千戶志調官籍於瓊博學能文嘗從趙攷古講學毅然能自立解學士縉稱之洪武末用大臣薦至京以三喪未舉力

辭歸隱天下聞其節行所著有截山詠史嶺南聲詩鼓吹等集兄懋字季成敦行善詩尤精於醫濟人不責其報有薦之者輒辭終身晦跡年八十餘

王宏字孟遠號蟄菴瓊山人少孤母韓氏矢節撫之既長力學工詩文以母年老不求仕開鄉塾訓子弟吟咏自娛正統間大叅龔璫都閩王清及致仕御史唐舟輩遊靈山分賦宏以布衣與列而氣體邁上徐祥萬州人世本常山父官稅課局生祥而卒鞠於

母孤苦力學登永樂戊戌進士知歙縣以母垂白不忍遠離遂以隱居終州人登進士自祥始祀鄉賢

劉志明字晦伯定安人性敏好學尤精於中庸年十八以諸生充貢永樂間奉當道敦遣署學事士多成就或勸其復應科舉長嘯曰學問人也出處命也遂耑於教事人稱建溪先生

蔡仕儲字鍾秀瓊山人質粹行純博通羣籍年十八臯比傳經即老師宿儒皆北面焉郡邑欲周其貧不

受高雷之士越海從之者甚衆領正德庚午鄉薦遊太學嘗發道心人心之旨及義利之辨祭酒湛若水深服之叅政林士元稱為明道先覺後竟不仕

鄭汝喬字允升文昌人穎悟博洽領鄉薦從湛若水講授三年歸篤志樂貧精思實踐甲辰中乙榜以親老侍養隱居不出

王允升字巽甫定安人父僖好義樂施有隱德允升重厚寡言笑不急仕進亦不治家人產嘗被盜有司

追還百餘金允升以非原物不受人稱其介子弘誨
至顯官

趙志科文昌人中嘉靖鄉試以母老侍養不仕性恬
淡結廬山中歌咏自樂州守柳塘旌之曰清修博雅
紀綱正字恒之其先監城人祖戍崖遂為崖人綱正
自少魁岸言論英發淹貫經史尤長於詩賦曾遊郡
庠累不得薦輒棄而耕於野題其室曰東岸書舍徜徉
林壑以終天年嘗曰書如靈丹服之便可入僊窮

通修短浮漚爾教授生徒表正鄉里崖士出具門者
多苦學勵行

曾沂澄邁人儒雅弘博號幽求子當道給冠帶詩章
辭以詩云寵錫也知章服重遨遊自覺草衣輕

雲名山字靜埜文昌人穎悟好學以貢為西寧新興
學訓歸而築月浦新居闢霞洞石室以資吟咏年九
十餘猶手不釋卷嘗得瓊山唐博士秘法祈禱立應
弟名元亦耽味道書年三十六即棄青衿偕隱邑令

賀沚表其隱德學使者給以冠帶不受兄弟俱至上
壽

右瓊州府

梁大材羅定人孝聞於鄉萬厯間歲貢厯仕至象州
知州遂不赴曰吾雖不及邴曼容於此足矣構五柳
居於州之南以吟咏山水自娛為師營墓設義田以
贍其族人

梁偉棟西寧人崇禎年間薦明經隱處不仕性溫厚

淳篤居躬坦易接人藹如津引後學諄諄不倦終身
未嘗私謁長史之庭累舉鄉飲不就令長以此高之
壽八十八

區國龍西寧人少孤貧事母至孝弱冠食餽邑庠試
必冠軍性抗直不少貶求仕怡情泉石詩文晚而益
工所著有黃石集

右羅定州

孝義文苑
三百六人

廣東通志卷四十七